

物猶如此

三巖徐謙編輯

汀州伊立勳題



海門陳鏡伊先生編

道德叢書

●道之平治齊修 ●血心年十費耗 ●遺無中其羅包 ●書叢部一此成 ●面十數畫字生先亭一王有並頁數千計共部全 ●


模範人生觀 婦女故事 家庭美德 孝史 官吏良鑒 法曹圭臬 民間懿行 軍人道德 考試佳話 巧獸之變談 人命之真諦 富室珍言

勤學篇 交友篇 立志篇 居鄉篇 器量篇 還金篇 事師篇 酒色篇 同學篇	賢母類 賢婦類 孝女類 惡婦類 兄弟篇	夫婦篇 父子篇 宗族篇	尋親篇 救親篇 孝感篇 養親篇 侍疾篇 顯親思親篇	清廉類 循良類 忠直類 仁德類 奸邪類	審檢官 律師 獄官 外官	商士篇 農篇 醫篇 雜工編	忠義類 仁德類 謀勇類 屯墾類 殘暴類 奸貪類	上編四十三案 下編四十八案 中編十二案	上編六十八案 下編六十四案	遷善篇 改過篇 定數篇	上編善例五十五案 下編惡例二十三案
---	---------------------------------	-------------------	--	---------------------------------	-----------------------	------------------------	--	---------------------------	------------------	-------------------	----------------------

●全四十部册加發獎憑一紙精美書一匣定價一元郵費角半

道德叢書另售 價目另售 模範人生 巧談觀人 每册一角 其餘十 二種每册 價洋各定 八分購 同樣購 上五册 者八折 十册者 七折 郵費酌

徐太史真容



上海图书馆藏书



A541 212 0013 9339B



重刊物猶如此序

物猶如此一書。爲吾邑徐太史白舫晚年所編。太史諱謙。別署鶴子。清庶吉士。性耽善籍。生平刊以行世者約六十餘種。沈文肅公稱其博大精深。集善書之大成。非過譽也。是書搜羅富。徵引切。採擇精。體例嚴。分案弁言外。各加詩箋。以宣其蘊。卽所謂借他對面菱花鏡。各自澄觀。自諦思。用心於覺世牖民者。重以周矣。間嘗論之人。自二五凝成以來。賦此虛靈不昧之良。莫不具有正性。及其知誘物化。本真旋失。名雖爲人。實無異於禽獸。况復倒行逆施。爲禽獸所不爲者。又不知凡幾。蓋一點虛靈。被六根遮隔。擺脫不開。而正覺不現。并禽獸有不如矣。佛氏有言。蠢動含靈。皆有佛性。編內自孝友。迄通慧。凡十四鑑。以物爲鑑。較以古爲鑑。尤深切。蓋物得氣之偏。尙知止其所止。可以人而不如乎。余夙嗜此書。喜其花樣翻新。足資借鏡。勝他善籍。感人深。往歲友人顧沛琦補版。經余一再校對。乙亥春。太原寒世子有志。重刊郵書。索序于兒子鍾時。時轉稟于余。余欣然起曰。有是哉。寒世子之樂善不倦也。洵與余心同理同。志同道同。是卽大善知識也。三生片石。善緣久締。豈必謀面爲相識。而未謀面爲不相識耶。記曰。善歌者使人繼其聲。善教者使

人繼其志。今寒世子繼太史之志。而爲之排印。行見麻沙廣播。太史之墨瀋筆花。悉化爲祥雲甘露。洒遍大千。挽頽風而弭浩劫。胥于是乎在。而寒世子善念之纏綿。善機之洋溢。善量之廣大宏深。益無量無邊矣。嗚呼。世人好閱說部。曷若案頭置此一書。自己朝夕熟玩而憬悟也。世人每積貲財以貽子孫。曷若授此一書。令子孫熟記而憬悟也。真常之道。悟者自。得及早猛省。毋令物類笑人。耿耿此心。質之寒世子將毋同時。

中華民國二十有四年歲次乙亥花朝日江西廣豐叔榮林熙恩沐手謹撰

一時勸人以口
百世勸人以書

物猶如此刊竣漫書簡端十首

廣豐白舫徐 謙時年八十有一

性善人爲萬物靈	如何讓物獨惺惺	新翻花樣拈公案	別有傷心老淚零
不乏完人史冊閒	貞廉忠孝攷斑斑	塵封可惜拋高閣	都道青大何處攀
且莫驚奇且莫疑	從來萬物聖人師	借他對面菱先鏡	各自澄觀目諦思
去來六道浩無涯	改換皮毛片念差	不朽靈根生意盎	淤泥中綻白蓮花
軀殼雖殊性不殊	天光靈炯現真吾	渾侖無物無人始	一個團團太極圖
不邀福報不邀名	只竭當前徑寸誠	此是乾坤浩然氣	千秋掩卷尙移情
聞風起懦志軒昂	道在天倫日用常	通慧終篇寄深意	齊開法眼認家鄉
未曾聞見等恆沙	會意何勞載五車	先我同心無限淚	漫將博物擬張華
子雲老矣媿雕蟲	三百詩成感慨中	安得琵琶聲裂帛	不同低唱綠楊風
世情厭故喜聞新	貴物何嘗薄待人	但願人人心轉善	普天孝子與忠臣

物猶如此總目

卷一

孝友鑑【二十四案】

卷二

忠義鑑【二十七案】

卷三

貞烈鑑【二十七案】

卷四

慈愛鑑【三十五案】

卷五

恤孤鑑【十五案】

卷六

眷舊鑑【二十六案】

卷七

踐信鑑【十三案】

卷八

守廉鑑【十五案】

卷九

翼善鑑【十九案】

卷十

救難鑑【二十七案】

卷十一

酬德鑑【三十四案】

卷十二

雪冤鑑【三十一案】

卷十三

知幾鑑【十三案】

卷十四

通慧鑑【二十九案】

徐太史遺筆

孝友鑑

民國二十四年春月上海霞飛路
護生報社營業部道德書局藏版

物猶如此卷之一

三巖徐 謙鶴子編

鄭 湘靈浦校刊

孝友鑑【二十四案】

孰無父母。孰無兄弟。猗嗟物兮。孝友如是。歌者傷心。聞者隕涕。輯孝友

孝象【矩齋雜記】

劉時用言見一老象將死。其子取草飼之。已不能食。則運鼻周拭其身。雙淚如雨。及母死。子泣躍而仆。

鶴子曰。一腔血淚。滴滴從心坎流出。昊天罔極。何處想起。真覺滄海無盡。血淚亦無盡也。

詩箋。乾陀萬里斷歸魂。運鼻周身半淚痕。血乳三年勞苦甚。何能寸草報深恩。

【說文象一乳三年】

猿拔母箭【聖師錄】

鄧芝射中猿母。見猿子爲母拔箭。吮其血。以木葉塞瘡口。悲哀不已。芝投弩而歎曰。山獸猶哀。母人可不如猿耶。吾從今不獵矣。

詩箋拾橡攀蘿不暫離。弓聲霹靂黑風馳。箭鋒洞處君休喜。看取猿兒吮血時。

●猿抱母皮死【聖師錄】

吉州有捕猿者。殺其母。以皮并其子。賣之龍泉蕭氏。示以母皮。子抱皮跳躑立斃。蕭氏子爲作孝猿傳。

鶴子曰。殺其母。而以皮示其子。不知是何肺腸。傷天地之和。觸鬼神之怒。莫此爲甚。

詩箋孤影空庭落月淒。前宵猶傍白雲栖。驚心瞥見魂銷盡。覓母黃泉掩面啼。

●犢吞刀【柳崖外編】

沐陽縣王屠。鼓刀解牛爲業。買子母牛二。先擬縛宰其母。磨厲以須。適有叩門者。置刀而出。犢乘閒銜刀。至鄰舍孫老家。觸門以角。孫故業農。出見犢口有刀。吞之。猶餘其半。須臾吞畢。對之哀號。方驚異。閒屠以不見犢。與刀尾之來。孫問之。乃知犢之吞刀。蓋不忍其母之就死也。問原值。加倍買之。解母牛。縛牽以來。犢見而號。號而跪。母牛亦臥而舐其首。至尾。孫意謂犢無生理矣。數日竟無恙。後牴牛力田。數年。犢亦力田。二十餘年。至孫老之子而後死。死後有聞吞刀之異者。剖腹視之。屠刀在腹胃閒。有厚皮包之。如新銚之括於囊橐焉。

柳崖子曰。傳有犢爲其母潛埋屠刀事。近世吾鄉王雅村。亦聞有之。此之吞刀。其情更慘。依依孫老家。力田至死。可謂母子不孤恩矣。

鶴子曰。驚天動地事。僅見此犢。我讀此案。始而咋舌。旣而歛容。旣而墮淚。旣而起舞。

詩箋吞刀鑿鑿莫疑虛。叩角獨尋孫老廬。子母乍逢仰天慟。一時狂喜更何如。

●犢藏刀【同生錄二編】

雲南安寧州趙屠宰一母牛。旣縛矣。入室取桶。其犢在旁。遽銜刀石隙。屠覓刀不得。鄰人告其故。屠不信。取刀置原處。隔窗視之。見其犢如前所爲。趙大悲悔。遂入華山爲道士。日叩神懺悔。養此二牛二十年。死而瘞之。

鶴子曰。此與送羊母子入寺之安屠。皆能發勇猛心。放下屠刀者。寒山子詩。所云蓮花生沸湯也。

詩箋刀頭轉瞬血飛紅。小犢銜刀計已窮。二十年閒隨母飯。華山消受好松風。

●犢銜刀【同生錄二編】

嘉靖乙卯。胡撫鎮賢。統兵禦倭。過臨山。小憩樹下。見屠兒將椎一牛。一犢尙隨乳。私銜利刃。至車溝內。以蹄踏沒泥中。屠徧索不獲。胡語其故。後沒於陣。

鶴子曰。藏刀石隙而母幸生。埋刃車溝而母竟死。犢之救母一也。而有幸有不。幸。豈非數之前定哉。然孝心耿耿。流傳至今。何嘗磨滅。詩箋。藏刀深密。畏人知。此境此情。良可悲。底事旁觀。喜饒舌。累他母子永分離。

●孝牛冢【井蛙錄】

金谿前參政漆尉山。爲余言。邑南四十里。地名九都。田家姓黎者。畜一子母牛。子齒剛半歲。七月閒。田家繫乳牛於家。駕母牛耕隴上。耕畢。放牛牧洲渚。日亭午。風雨晦冥。雷電交作。牛忽爲霹靂所擊。田家招集隴上人。委斃牛於河。歸見乳牛臥圈中。憐而歎息曰。若母已爲雷擊死於某隴上洲渚矣。乳牛遽起。悲鳴不已。次日黎放牧他所。去洲渚猶里許。卽騰躍奔至其母被擊處。躑躅號咷。不飲不食。屢逐不起。旣而鞭之歸。歸則脫韁逸去。偵之。則復遶哭前處。一晝夜不絕聲。撞地頭破而死。鄉人哀其孝。瘞於死所。封其墓。表曰孝牛冢。至今尙存。此順治丙申七月事。鶴子曰。一乳牛耳。而能傷慟其母如此。且傷慟而竟能以身殉母死如此。詩箋。膝下初離。盼未歸。昨宵含乳夢依依。英靈尋母河洲遍。怒蹴寒濤十丈飛。

●犢排戶【警心錄】

桐廬人畜一犢。一犢同日驚之。農者取犢。屠者取犢。並驅出門。屠引犢渡溪。入其

家。犢立溪外。引首長鳴。農鞭之不動。促之行。每數步必回顧。越複嶺。穿支徑。至田家。置之欄中。屠夜具湯鑊。且將烹。特聞戶外牛鳴甚急。特應之亦急。屠起視之。則農向所買犢也。排戶而入。跳依母旁。特亦連舐其頸。屠雖悍忍。惕然動心。反湯滅火而寢。農失犢所在。求之數日。遇屠具言其事。相與歎息。農並以原值贖特而去。李斯義曰。子鳴母應。情何眷戀。排戶而入。情何急切。讀此令人惻惻。

●羔臥刀【同生錄二編】

邠州屠者安姓。家有牝羊並羔。一日欲割其母。縛上架之。次其羔忽向安雙跪前。膝兩目涕零。安驚異良久。置刀於地。去喚一童稚共事。割宰及回。遽失刀。乃爲羔口銜之。置牆陰下而臥其上。安疑爲鄰人竊。忽轉身趨起。羔兒見刀在腹下。遂頓悟。卽解下。母羊與羔並送僧寺乞長生。自身尋捨妻孥。投寺內竺大師爲僧。名守思。

鶴子曰。霜鐘一杵。大眾試靜思。此羔瞥見縛母時。若何心碎。跪屠時。若何血迸。臥刀時。若何膽戰。隨母入寺時。若何足蹈。孝哉羔乎。毅哉屠乎。詩箋。殺機一動。幾時休。羔跪屠前。枉淚流。轉眼擘開生死路。何人刀下肯回頭。

●東莞五乳犬【陳定九孝犬傳】

孝犬。廣東東莞縣隱士陳恭尹家牝犬子也。牝犬色白而尾辟。四足皆黑。恭尹痛父死國難。矢志不進取。隱居山中。以吟飲自縱。不與時人通。此犬隨恭尹。未嘗須臾離。每出則犬先行數百步。若以爲導者。遇豺狼蛇虎。則亟返。嚙恭尹衣袂曳之。還若不使前者。恭尹悟。卽旋犬。犬又隨後離數十步。作大聲嗥。若以爲衛者。以是爲常。夜則於廬舍前後巡。且吠。達旦不少休。數年犬一乳五子。皆牡。既長。恭尹分贈前後左右鄰家畜。皆能司門戶不怠。初分之歲。餘母犬日往各家視乳犬。一周若訓之勤者。有食。乳犬輒讓母犬食。乳犬既壯。母犬卽不往視。而乳犬每早輒齊來。恭尹家視母犬。又數年。母犬病癩。瘦將死。乳犬日齊來。爭與母犬舐癩。遂愈。每至元旦。五乳犬輒齊來繞母犬。搖尾若爲母犬賀歲狀。後母犬死。五乳犬皆哀號不止。恭尹憫之。瘞之後。山五乳犬每早輒齊往瘞處哀號。如是者數年不輟。

蘅塘退士曰。此文當與昌黎董生行參看。

鶴子曰。元孝先生高懷亮節。時露詩歌。迄今讀獨漉堂集。忼爽激烈。想見其爲人。此犬託身忠義之門。得其主哉。觀其始終事主忠矣。五子之孝。殆其母忠於所主之冥報乎。

詩箋。劫火餘生笑種瓜。仙厖衛主守煙霞。不慚獨漉堂前走。孝子鍾靈義士家。

●孝義犬【聖師錄】

唐禁軍大校齊瓊家畜俊犬四。常畋迴廣囿。輒飼以梁肉。其一獨填茹咽喉齒牙。閒以出。如隱叢薄。然後食。食已。則復至。齊竊異之。一日令僕伺其所往。則北垣枯竇有母存焉。老瘠疥穢。吐哺以飼。齊奇歎久之。乃命篋牝犬歸。以敗茵席之餘餅餌飽之。犬則搖尾俛首。若懷知感。爾後擒奸逐狡。指顧如飛。將扈獵。駕前必獲。豐賞逾年。牝死。犬加勤効。後齊卒。犬日夜嗥吠。越月將有事於邱隴。留犬以禦奸盜。及懸棺之夕。犬獨來足踏成坳。首叩棺見血。掩土未畢。犬亦斃。

李斯義曰。犬陰養其母。瓊愛犬而並及其母。犬益感恩。可見子之孝親。人物皆然。而瓊之恩亦足以致犬之死。則世之不加恩養而欲人之以死効者。亦見之左矣。

詩箋。病母銜恩豢養豐。赤心報主死生同。豈惟孝犬人閒少。更有稜稜國士風。

●犬哺母【警心錄】

詹材。德興田舍民家貧。犬生子無食。鹿坡王氏相距半里。求其子歸。飼以糟糠。每食竟。卽掉尾返故處。嘔以哺母。至暮復然。風雨不輟。有士人爲賦。孝犬歌。

詩箋。敢辭風雨路艱辛。朝暮徘徊傍母身。安得家家歡菽水。白頭誰念倚閭人。

●都押衙犬子【玉堂閒話】

秦州都押衙石從義家。有犬生數子。其一獻戎帥琅琊公。自少至長。與母相隔。及節使率大將與諸校會獵郊原。其犬忽子母相遇於田中。忻喜之貌。殆不可狀。獵罷。各逐主歸。自是其子逐日於使廚內竊肉歸飼其母。至有銜其頭。肚。肩。脇。盈於衙將之家。衙中人罕有知者。

李斯義曰。母子至性。久相隔而偶相遇。其喜自倍於尋常。閱此不覺興感而歎。詩箋。宋鵠韓盧蹴陣雲。乍逢母子兩欣欣。何勞考叔嘗羹請。不似東方遺細君。

●稚犬斃虎【警心錄】

村民趙五。其家犬生子甫兩月。隨母行。母爲虎噬。五呼集鄰里壯士。持矛逐之。稚犬奔銜虎尾。虎帶之走。犬爲荆棘挂。冒皮毛殆盡。終不肯脫。虎因繫累行遲。衆追及斃。刀下。

李斯義曰。稚犬捐軀不顧。真是天性。可見天下巨奸肆虐。匹夫切齒。便可畢命。故惡不可肆。小不可欺。率皆如是。

詩箋。犬銜虎尾疾颯馳。虎怒咆哮犬不知。雪滾刀光虎頭落。孝心天亦與扶持。

●三孝犬【聖師錄】

淮安城中民家有母犬。烹而食之。三子各銜母骨。抱土埋之。伏地悲鳴不絕。里人見而異之。共傳爲孝犬云。

鶴子曰。泚穎掩親。迫不及待。想見三子悲哀含骨。蒼黃抱土時也。

詩箋。爭相銜骨。妥荒隅。伏地悲號。淚血枯。人子愈多親。愈苦一抔。何處待青鳥。

●犬瘞母骨【警心錄】

黃琛甫。新昌人。有牝犬。爲邏卒所食。棄骨屏處。其子含之瘞諸野。

李斯義曰。世有殮而不葬。待其富貴。擇佳阡。因循歲月。家計蕭條。卒至欲葬而不能者。皆棄骨也。

詩箋。狺狺何事。意倉皇。含骨逡巡。古道旁。過客爭詢埋母處。野風吹徧土花香。

●李學士宅孝貓【秋坪新語】

李學士文園家。畜貓。生二子。牝牡各一。後牝死。牡在其母每臥。則必枕其子。子爲所枕時。帖耳瞑目。癡若土木。蓋恐驚母臥也。或身癢。偶小轉側。母卽怒。嚙爪裂。往往血毛絲落。子伏首順受。無敢逸。如是者數年。留心察之。百不失一。母後以癩死。子哀泣嗷嗷。晝夜不絕聲。飼之不食。偶窗前有繫物繩。垂下。及旦視之。貓縊其上。

糾纏百結。急不可解。衆咸歎異。呼爲孝貓。

浮槎散人曰。性真之地。原不可以施報論。顧恩勤鞠育。彼儼然人者。且有視等行路者焉。蠢茲一貓。而竟虐之不敢避。事之惟恐傷。卒之母死而不惜。以身殉也。人何求多。苟能無愧。此貓亦庶幾乎。

詩箋。絲毛雨落。血涔涔。孺慕依依。夢裏尋。誰謂烏員仙。蛻去片魂。枕母臥花陰。

●烏反哺【禽經】

慈烏曰孝烏。長則反哺其母。觜小而白。

鶴子曰。運斗樞云。烏陽烏陽。氣仁故反哺。惟仁斯孝。天性然也。

詩箋。爲雛銜食羽毛。摧雛長酬恩。老漸催。愛日無多。休錯度。何能反哺到泉臺。

●長興孝鵝冢【寰宇記又載人譜類記】

天寶季年。長興沈氏畜母鵝。育卵而腸出。以斃。其雛悲鳴不復食。啄敗薦覆母。復銜芻草列前。若祭奠狀。向天悲叫而絕。沈以爲異。函而埋之。後人因呼孝鵝冢。

李斯義曰。一鵝雛耳。卽知孝母。人於父母當何如。曾見有人飲酒食肉。嘻笑戲謔於讀禮時。自託高致。此必無人心者。讀此能不愧煞。

鶴子曰。親沒如此悲切。不知親存若何依戀也。

詩箋。事死何如及事生。仰天泣血涕縱橫。爲兒捨命身難贖。泉下誰聞慟母聲。

●蝙蝠識母氣〔警心錄又見鄭暄昨非菴日纂〕

鮮于氏眉州人。因合藥礫一蝙蝠爲末。及和劑。則有數枚小蝙蝠圍聚其上。目皆未開。蓋識母氣而來也。一家爲之灑淚。誓後合藥不用生命。更勤於放生。藥未服而疾旋愈。〔以上孝鑑〕

李斯義曰。蝙蝠識母氣而來。可見母子一氣同體。生死相關。故斷不可以生命合藥。夫傷物以救己命。卽能救亦屬殘忍。况未必能救耶。憶予乙亥歲。安孺人病篤。醫家謂用全鼈和丸可救。予不許。醫暗製服。竟不瘳。夫不能救而徒傷物命。可慨也。嗣是凡遇炮鼈。卽不爲我殺。亦永不復食。以當懺悔。

鶴子曰。辭觀蝙蝠識母氣圍聚一事。不特當時盡室灑淚也。至今予讀之。亦爲掩卷淚涔涔下。昔孫思邈著千金方。濟人廣矣。而以物命爲藥。神讓其不得白。日輕舉。後思邈取草木之藥。代蟲蟲水蛭之命。作千金方三十篇。乃仙去。又華陽陶隱君。見其執役門人桓闔。先馭鶴而升。陶曰。某行教修道。勤亦至矣。得非有過而淹留在世乎。頗爲訪之。三日。桓君降。密語陶曰。君之陰功著矣。所修本草。以蟲蟲水蛭輩爲藥。功雖及人。而害物命。以此一紀。後方署蓬萊都水監。陶

乃以草木代物命者。著別行本草三卷。以贖過。後得道。夫以濟人爲懷者。猶以戕物命而難道。天譴如此。此可悟天心好生。非厚於人而薄於物也。章章矣。詩箋。藐孤雙睫未曾開。那識遙尋母氣來。縷縷斷魂猶戀子。藥鐺煙外影徘徊。

●同母牛【異譚可信錄】

宣城王氏兄弟不和協。因而析爨。猶相牴牾。兄畜牝牛產犢。鬻於戚。繼又產一犢。而牝牛死。戚復鬻犢於其弟。同兄犢置牧場中。迨晚。兩犢同宿。兄欄內。弟力挽不出。自是往來迭宿。似識爲同母生者。兄諭弟曰。牛猶若是。可以人而不如獸乎。弟感泣。友愛如初。

鶴子曰。兩犢戀戀不舍。物之性光發現處。兄弟怛怛忽動。人之性光發現處。詩箋。愧殺操戈共室人。相傾相軋忽相親。看渠兄弟溫存意。也似姜家布被春。

●犬痛同懷【建甯志】

咸溪童鏞家畜二犬。一白一花。共出一母。性狡獪。解人意。後白者忽目盲。不能進牢而食。主人以草藉檐外臥之。花者銜飯吐而飼之。夜則臥其旁。及白者死。埋之山麓間。犬乃朝夕往繞數匝。若拜泣狀。臥其旁。必移時而反。鶴子曰。骨肉之恩。手足之愛。是犬生則推食以食。沒則竭誠盡禮。洵無忝友于。

矣。

詩箋。釜中豆泣更燃其。犬性纏綿乃若斯。含飯傷心黃土隔。夕陽子影下山遲。

●羽聲合刻【因樹屋書影】

有宦閩者攜雙鸚鵡歸江右。兩禽晨夕相依。如昆季。宦者以其一贈陳子右。蒯韓子人穀亦得其一。陳韓固親串。過從無閒。鸚鵡時互相問哥哥好。未幾陳子齋中有異物搏鸚鵡死。陳子痛之甚。除地瘞之。又語人穀賦詩弔之。詩成人穀持告其家。羽輒騰擲架上曰。哥哥死。哥哥死。傷惋不勝。遂不食。越日亦蛻去。二子廣乞名詞。爲之志述。江右三吳諸詞人皆有作。因彙爲一集。顏曰羽聲合刻。鄧子左之爲之序。物固多情如此。

鶴子曰。互相問曰。哥哥好。說不盡。別後惓戀之况。聞凶信曰。哥哥死。說不盡。當時慘裂之慟。

詩箋。同來閩嶠樂如何。誰料參商飲恨多。旅鴈分飛雲水斷。幾曾芳訊到哥哥。

●舁無足蟹過斷【蘭義】

松江幹山人沈宗正。每深秋設斷於塘。取蟹入饌。一日見二三蟹相附而趨。近視之一蟹八腕皆脫不能行。二蟹舁以過斷。因歎曰。人爲萬物之靈。兄弟朋友有相

爭相訟。至有乘人危困而擠陷之者。水族之微。乃義如此。遂命拆斷。從茲不復嗜團臍矣。〔以上友鑑〕

吳長卿曰。古語以手足痿痺爲不仁。非也。兄弟手足也。兄弟而不仁。乃真痿痺也。蟹無足不能行。二蟹負之而趨。吾不知其兄弟乎。朋友乎。然此乃真手足也。一象被傷。則羣象相扶之。病則相守之。死則向南跪拜。哀鳴三匝。相與以木覆之。吾不知其兄弟乎。朋友乎。然此亦真手足也。

鶴子曰。物之真性到十分。可以動人人之真性到十分。可以動天。詩箋。欲行且止。倩誰扶。一蟹蹣跚八腕無。安穩中流向前去。餘生相傍老菰蒲。

千百年來益裏羹 冤深如海恨難平

欲知世上刀兵劫 但聽屠門夜半聲

右錄願雲禪師偈

孝友鑑終

三孫徐兆杏雨壇同校
湖南張海社修五覆校

徐太史遺筆

忠義鑑

民國二十四年春月上海霞飛路
護生報社營業部道德書局藏版

物猶如此卷之二

忠義鑑目次

明皇象

元駕象

象擊賊

定南公

粵中戰象

昭宗猿

龍泉白馬墓

陳都督馬

河北駿馬

蜀藩白驃

二犬助戰

厓山鷗

衆鳥赴火

羣蜂投江三日

◎以上忠鑑

南坡義猴傳

安福猴

白塔山猴

瑞昌門外義猴

忽雷駁

陳平章馬

畢將軍戰馬

克勒

張行人義驃

姚氏二犬

◎作傑愷子豐◎



金絲犬

犬殉主

黑兒像贊

◎以上義鑑

◎角一洋册每◎

物猶如此卷之二

三巖徐 謙鶴子編 鄭 湘靈浦校刊

忠義鑑【二十七案】

乾坤正氣。乃鍾於物。義膽忠肝。淋漓快筆。掩卷激昂。靈風拂拂。輯忠義。

明皇象【警心錄】

唐明皇每賜酺御樓。引大象拜舞。動中音律。及西幸蜀。祿山驅舞象入洛陽。大宴羣酋。出舞象給之。曰。此自南海奔至。以吾有天命。雖異類必拜舞。令之舞。象皆憤怒。努目不動。祿山盡殺之。

李斯義曰。舞象不助逆。以欺羣酋。此與衆梨園之歎。歎泣下何異。人物同情。雖櫻死奚懼哉。

詩箋。裂背刀頭死若生。象魂泣拜錦官城。慟心凝碧池頭醺。不獨錚錚雷海清。

元駕象【聖師錄】

元有駕象。明太祖登極。不肯拜跪。竟死爰下。

閒居偶錄載明林子羽義象行云。有象有象來大都。大江欲渡心咨且。誘之既。

渡獻天子拜跪不與衆象俱。象奴勸之拜，怒鼻觸象奴。賜酒不肯飲，飼之亦不哺。屹然十日受飢渴，俯首垂淚憤且吁。天子命殺之，衆官束手莫敢屠。侍衛傳宣呼壯士，披甲各執丈二殳。衆戰久不克，兵捷象乃殂。憶昔君王每巡幸，象當法駕行天衢。珊瑚錯落明月珠，被服美錦紅氍毹。紫泥函封載玉璽，萬樂爭擁羣龍趨。玉璽歸沙漠，龍亦歸鼎湖。所以老象心，南來誓死骨爲枯。嗟爾食祿人，空負七尺軀。高高白玉堂，赫赫黃金符。伊昔軒冕今泥塗，嗟爾食祿人不若飯豆芻。象何潔爾何污，天子垂衣治萬世。俾全象德行天誅，嗚呼象兮古所無。嗚呼象兮古所無。

詩箋忍看荆棘臥銅駝，意氣受前骯髒多。不讓將軍王保保，一時色壯舊山河。

●象擊賊（滇黔和游）

義象冢在馬隆州。明天啓閒，水西安氏叛，率衆犯州。滇省戒嚴，撫軍調陶土司禦之。陶有一象，日將暮伏山澗中，鼻泥水數斛，突出咆哮跳躍，鼻噴泥水直抵賊壘。賊衆驚駭，歛捲一賊擲空墜死。陶牙將乘機逐北，遂獲大捷。及曉收師，象中毒弩而斃。土人德之，瘞於南山。春秋祭掃，至今不替。

鶴子曰：彼竭我盈，故克之。象何智且勇哉！不幸中弩而斃，丹誠耿耿，精靈如在。

於象乎奚傷。

詩箋。隻身辟易萬貔貅。血食南山春又秋。鼻捲賊頭齊破膽。風雲長護馬隆州。

●定南公【聖師錄】

明廣西有象。封定南公。吳三桂日橫。欲將象解京。象昂首直觸。象奴百計勸勉。終不服。三桂大怒。刀矢不能傷。以火炮攻斃之。

詩箋。粉骨飛灰不顧身。象奴苦勸象彌嗔。赤心只有蒼天鑒。愧爾承恩拜爵人。

●粵中戰象【懸榻編】

數年前粵中獲一戰象。諭之降。不許。死則點首。乃以火鎗三百環射之。糜爛死。死猶屹立不仆。

徐仲光贊曰。披堅有年。死敵其律。地絕天窮。吾事斯畢。崩角未能。洞胸奚恤。以此強項。告彼柔膝。

詩箋。斷頭無憾効孤忠。戰象斑斑浴血紅。屹立乾坤留浩氣。火鎗煙裏化清風。

●昭宗猿【聖師錄】

唐昭宗有猿。隨班起居。賜以緋袍。朱梁篡位。召此猿令殿下起居。猿徑趨座前。跳躍奮擊。朱怒立殺之。

鶴子曰。朱則孤恩。猿不負德。宰相張文蔚輩。何處容身哉。
詩箋。乾坤瀕洞。罷朝參恩。渥難酬。淚暗含也。忝玉皇香案吏。堂堂豈肯事朱三。

●龍泉白馬墓【聖師錄】

龍泉縣有白馬墓。開國勳臣胡公深所乘之桃花馬也。公以征陳友定。遇害。其馬馳歸門外。悲嘶氣絕。夫人義之。因葬焉。標曰白馬墓。

詩箋。奔回匹騎一門驚。繞墓飛沙怒未平。月夜騰空風鬣動。長嘶猶趁舊屯營。

●陳都督馬【鉛山縣志】

二忠祠在鉛山陰漿口。正統十三年十一月。處州賊葉希八劫車盤嶺。副都督陳榮帥二千兵。同指揮戴禮合兵進勦。榮至祝公橋。賊誘入周道塢。宋家磔。兩山伏甲。首尾相擊。榮禮力戰死。榮馬自十三都躍入縣堂。三跳而斃。鄉人憫其忠。立祠祀之。

詩箋。帶來戰血徧身流。三躍公堂怒不休。都督忠魂應未遠。揚鞭待我陣雲頭。

●河北駿馬【縣志編】

流賊破河內。縣令丁運泰。大罵被磔。所乘馬駿甚。賊將騎以入縣。至堂下。大嘶人立。狂逸不可制。觸牆而死。

徐仲光贊曰。本自可生。亦知無責。悼彼傾崩。忍忘鞭策。彼肉則麋。我心斯石。是馬是人。大河以北。

詩箋。觸死衙前怒尙嘶。令君與馬赤心齊。願爲厲鬼先驅賊。萬顆頭顱踏作泥。

●蜀藩白驪【聖師錄】

張獻忠之破蜀也。蜀藩率子女宮人投井死。王所乘白驪。躑躅其旁。亦跳入殉焉。後樵蘇者。值天陰時。於蜀宮故址。往往見白驪出沒蔓草間。

詩箋。無聲躑躅有餘悲。宮井苔花好護持。莫遣銀牀秋雨塌。此中碧血尙淋漓。

●二犬助戰【警心錄】

紹興二十九年冬。撫州宜黃縣劇盜謝軍九。鳩衆百輩。椎埋剽劫。戕殺李縣尉家。知縣李元佐適在郡。尉遣弓兵討捕。都頭劉超前行。王宣繼之。與盜遇。超卽遁。宣所部不及盜之半。大呼鏖戰。黃山下。宣素畜二犬。每出必從。是時亦奮呼噬盜死者二十人。遂奔潰。宣退休山上。已而盜復還。盡斷死者首。攜以出。蓋慮爲官兵所識。宣望見。怒曰。我殺之。而縱彼取頭顱去。何憑報級。率衆趨下。再戰移晷。反爲所敗。宣與二兵得三級。馳取徑路。絕田而西。方穿橐栝中。陷於淖。盜追及。俱遭屠戮。二犬守其尸。部伍環集。以事白於縣。元佐回邑。厚卹三家。命治棺往歛。犬凝立經

日不食。見家人搖尾迎之。導至尸前。宣歸葬。犬亦死。

李斯義曰。宣討賊甚力。二犬相從。噬賊已屬。難得更難。其死而守其屍。葬則殉其難耳。

詩箋。莫云用犬猛何爲。追賊如風。肉亂飛。可惜功成銜恨死。戰場駐馬客歎歎。

● 厓山鷗【聖師錄】

厓山之敗。陸秀夫負祥興帝赴海。時御舟一白鷗。奮擊哀鳴。和籠墜海死。

明張廷實白鷗歌云。君不見瀘南秦吉了。飢死不入蠻夷邱。又不見唐家孫供奉。奮跳欲斷朱三喉。嗟爾白鷗急主難。委質翻配三忠儔。憶昔海黃霧四塞。天狗如雷墮東北。三辰鑿戰日無輝。伏屍百萬海盡赤。六軍披靡可奈何。雲從飛龍赴碧波。白鷗籠中起躑躅。恨不握劍揮長戈。劍欲截斷參政首。戈欲鑷絕宣慰脰。請回飛龍駕雲車。直抵中原揮一帶。皇天不祚趙孤兒。白日不照吾心悲。聳身直翅輕一擲。竟與金籠鮑鯨鯢。嗚呼白鷗乃羽族。報主恩義何其篤。如何廁中拉脇奴。禽獸之心人面目。太倉飽士多如林。算來何如豢此禽。羽衣縞裳奪霜雪。忠肝義膽追鸞鶴。只今茫茫海天角。魂逐三忠戲溟漠。千回化作精衛翔。悲鳴直待滄溟涸。詩見閒居偶錄。

鶴子曰。和籠墜海死五字。如見鬼神閃惚情狀。

詩箋。海哭天哀。戰血紅。更無人到。倩開籠茫茫。精衛無窮恨。都付崩濤慘霧中。

●衆鳥赴火【廣輿記】

鳳凰山在蒙化府城西南。昔有鳳鳥死。此每歲季冬。衆鳥哀弔其上。土人於鳥來夜燃炬候之。鳥輒赴火死。

詩箋。橋山風肅。月黃昏。阿閣輝光久。拜恩草莽微。臣慚後死。煌煌大義炳乾坤。

●羣蜂投江三日【聖師錄】

正德閒。鎮江北固山下。有羣蜂擁王出遊。遇鷺鳥攫其王。噉之。羣蜂飛鳴不去。自投江中。前後死者三日。乃盡。楊遂菴相國一清。令家僮瘞焉。表其冢曰義蜂。作文祭之。【以上忠鑑】

徐仲光贊曰。垂裳蒙難。禍絲輕徙。左右伊何。臣罪萬死。慟彼銛鋒。慘此滔水。五百田橫。共成一是。

●附錄

池北偶談云。金山有義蜂冢。鎮江府廨有蜂一筒。逸出。其主斃。羣蜂相揉藉。爭死之。不下萬餘。嘉靖中。鎮江嚴同知者。爲立義蜂冢。徐尙書養齋。問作蜂冢歌。

紀事云。羣蜂勢方屯。主蜂自殘折。意氣許與成。君臣義心欲奮秋。陽烈摧軀抉。股同死。君田橫門客多如雲。後人重死不重義。捧頭鼠竄何紛紛。微蟲感恩乃至爾。吁嗟萬靈不如此。金山山高江水寒。孤冢蒼茫爲誰起。西園雜記云。嚴名應階。綠雪堂雜言云。在北固山楊遂菴閣。老表爲義蜂冢。

亦復如是云。有姚姓者。善養蜂。歲獲蜜數千斤。家以小康。余嘗至其家。姚告余曰。蜂一日兩衙。應潮上下。不差時刻。或風雨將至。則潮愆期。以驗陰晴。恆不爽也。時余正同姚觀蜂衙。適牆角雨塌。收蜂之器。壓損其一。見內所營之窠。中聳一臺。大如桃李。一蜂大於衆蜂。青蒼色。獨居於上。姚曰。此蜂王也。余曰。觀此。則王元之之蜂記。所謂營巢如臺。擁王而行者。句句實錄。化書云。蜂有君臣之禮。不誠然乎。姚曰。蜂微物也。胡亦有知。余曰。不觀之蟻乎。其居有等。其行有隊。昔人謂蟻有君臣之義。故字從義。蜂與蟻皆微物。蟻既有知。則蜂應亦有知也。况凡物莫不有知。如駝知泉脈。老馬知塗。燕知戊己。蝠知庚申。鶴知夜半。雞知將旦。鵲知太歲。鼃知應更。魚知丙日。鼠知拱立。狐知聽冰。蜃知噓樓。極之歲蘭。知元日。桐與棕。欄知閏月。草木無情之物。且亦有知。則血氣之類。其有知宜也。不過得氣之偏。知僅於此。不能就所知而擴充之。所以爲物。人則萬善皆備。無所

不知所謂人爲萬物之靈也。盡其量則爲聖人。惟梏之反覆。不特近於禽獸。其一知之明。且有時反不能如物也。可危哉。

詩箋。萬蜂爭擲浪花堆。三日江雲慘不開。諫獵書曾回漢武。侍臣惜乏馬卿才。

●南坡義猴傳【宋曹會秋堂文集】

建南楊子石袍告子曰。吳越閒。有鬚髯丐子。編茅爲舍。居於南坡。嘗畜一猴。教以盤鈴傀儡。演於市。以濟朝夕。每得食。與猴共。雖嚴寒暑雨。亦與猴俱。相依爲命。若父子然。如是十餘年。丐子老且病。不能引猴入市。猴每日長跪道旁。乞食養之。久而不渝。及丐子死。猴悲痛旋繞。如人子躑躅狀。哀畢。復長跪道旁。悽聲頰首。引掌乞錢。不終日得錢數貫。悉以繩錢入市中。至棺肆不去。匠果與棺。仍不去。伺擔者輒牽其衣裾。擔者爲舁棺至南坡。殮丐子埋之。猴復於道旁乞食。以祭。祭畢。遍拾野之枯薪。廩於墓側。取向時傀儡。置其上。焚之。迺長啼數聲。自赴烈焰中死。行道之人。莫不驚歎而感其義。爰作義猴冢。

張山來曰。有功世道之文。如讀徐阿寄傳。

詩箋。事生事死費躊躇。腸斷南坡舊草廬。烈火燄中魂冉冉。彩霞天半擁颿車。

●安福猴【曠園雜志】

康熙九年庚戌冬。積雨雪。自十月至十二月二十四日。雪益甚。行者多失足至死。安福縣有戲猴行乞者。肩一篋。登邑之狗爬嶺。風凜衣敝。卻行不得。上遂僵死。嶺半。是時猴計窘。四望前有客三人。趨別道。急前扭之。三客力求脫不得。問猴有所訴乎。卽叩頭。命猴前引。至嶺半。則一死人。棄擔在道。客驚謝曰。不速去。恐後來者謂吾輩有戒心。殆矣。猴向客哀號不已。客問有何事。當如所謂。猴取死者鎖鑰。啓篋得銀三兩。猴平秤給三客。客曰。以此具棺乎。謝不能。猴搖首再四曰。給吾輩辦事。葬主人乎。卽諾諾應聲。三客同力掘穴。將瘞尸。猴告且止。更取擔上草蓆十貼。出篋中木棉數斤。割入蓆分棉三分之一。授三客令裹骸。客爲泣下。一一經紀。封土畢。對白猴曰。願攜汝歸養。汝何如。猴不應。繞土三匝。慟號跳躑。首觸石而死。三客始知先餘棉蓆者。爲當葬自身也。卽縛束猴與戲猴者爲合冢。葬嶺上道旁。三客還爲安福人道其事。湘潭郭幼隗爲義猴傳。

詩箋相依爲命。慟途窮。慘慘彤雲獵獵。風願附主人同藁葬。生理熱血雪花紅。

◎白塔山猴〔聖師錄〕

正德辛巳。有夫婦以弄猴爲衣食者。十稔矣。寓嘉州白塔山。主者死。葬於塔之左。猴日夜號。其婦更招一丐者爲夫。猴舉手擲揄之。婦弄猴使作伎。猴伏地不應。鞭

之輒奮叫入夜走主者之墓抱土悲號七日而死。

詩箋羞抱琵琶塞耳聽也同七日哭秦庭嘉州白塔山前路哀嘯寒楓鬼火青。

●瑞昌門外義猴【聖師錄】

咸熙中有翁嫗弄猴瑞昌門外一日嫗死翁葬之未幾翁死無人葬猴守之日久人憐而葬之咸稱爲義猴。

詩箋待誰負鍾妥翁身蹙踊無殊子喪親落木蕭蕭啼不住酸風愁絕路旁人。

●忽雷駁【酉陽雜俎】

秦叔寶所乘馬曰忽雷駁常飲以酒每於月明中試能豎越三領黑氈及胡公卒嘶鳴不食而死。

詩箋四蹄奔月躡青煙颯爽英姿馬亦然何處敝帷埋駿骨欲澆醅醪野風前。

●陳平章馬【稽神錄】

淮南統軍陳璋加平章事拜命於朝李昇時執政謂璋曰吾將詣公家道賀且求快婿公其先歸璋策馬去中路馬蹶而墜頃之昇至璋力疾出昇慰訊已恩恩告別璋召馬數之曰吾今日拜官又議親事爾乃墜我畜生不忍卽殺使牽去勿與芻秣是夕圉人竊具芻粟馬視之而已達旦不食如是累日圉人以告璋復台語

之曰。爾既知罪。吾赦爾。馬跳躍而去。是日乃飲飫如故。璋後出鎮宣城。罷歸而薨。旬日。馬悲鳴而死。

詩箋。的盧今日竟妨吾。數罪何辭謝秣芻。故相思深難寸報。靈輻努力効前驅。

●畢將軍戰馬【聖師錄】

畢再遇。兗州將家也。開禧中。戰累有功。金人認其旗幟。卽避之。後居於霅。有戰馬。號黑大蟲。駿駟異常。獨再遇能御之。再遇死。其家以鐵絙羈圜中。會嶽祠迎神。聞金鼓聲。意謂赴敵。仰嘶奮迅。斷絙而出。其家慮傷人。命健卒十人挽之而歸。好言誠曰。將軍已死。汝莫生事累我家。馬聳耳以聽。汪然出涕。喑啞長鳴而斃。

詩箋。烏騅伏櫪失重瞳。百戰沙場翊大功。熱血滿腔何處灑。仰天一慟颯靈風。

●克勒【聖師錄】

國朝和碩親王有良馬。曰克勒。猶漢言棗騮馬也。高七尺。自首至尾。長可丈有咫。耳際肉角寸許。腹下旋毛若鱗甲然。翹駿倍常。識者詫爲龍種。王愛之。王薨。馬躑躅哀鳴。未幾隨斃。

詩箋。龍種奇姿一顧空。天人駕馭必英雄。世無伯樂誰真賞。昂首悲嘶萬里風。

●張行人義騾【池北偶談】

同年張鶴洲行人。嘗乘一騾。甚愛之。康熙甲辰。鶴洲以科場事下刑部。饘粥不繼。乃以騾抵逋於人。一日過市。酸嘶悲鳴。墮其新主。而逸歸張邸。稍近之。輒蹄齧不已。家兄西樵。官吏部。爲賦義騾行。嗚呼。此騾勝華歆賈充褚淵六臣之徒多矣。

詩箋。義騾日下競稱奇。消得瑯琊吏部詩。新主縱然芻秣好。不如故土樂忘飢。

●姚氏二犬【廣異記】

吳興姚某。開元中被流南裔。隨行者奴二犬。二奴曰附子。其子曰小奴。性俱悍。居南久之。惆悵思鄉。計害其主。庶家得歸。姚僻處鄰里。不聞附子。忽白主云。郎君燕人也。今流離萬里。倘有不祥。奴當扶櫬歸北。頃覺衰憊。恐溘然朝露。小輩無能爲役。則郎君遺骨。長此漂泊他鄉矣。願早圖之。姚喻其意。云。汝欲我死耶。奴曰。正爾慮之。姚請約來朝。及晨。奴父子豐膳。婉勸加餐。姚停觴。哽咽。見二犬依依左右。適奴入時。與之食。因撫二犬云。豢汝多年。今奴殺我。汝知之乎。二犬亦哽咽不食。願主悲號。俄附子至。一犬突咋其喉。斃。一犬疾入廚。咋小奴喉。亦斃。又咋附子之婦。斃之。姚遂免難。

鶴子曰。奴父子陰謀叛逆。炯炯在二犬心目中。含憤切齒。豈伊朝夕哉。前此臥月吠花。傍主自若。後則轟霆掣電。斬草除根。犬乎犬乎。義也而神矣。

詩箋。一般豢養兩般心。觀變迎機智勇沈。劍客空空輸痛快。驚魂乍定涕沾襟。

●金絲犬【聖師錄】

沈處士恆吉。購一金絲犬。長不逾尺。甚靈警。晨夕與俱。憐惜備至。三載處士病。犬不食數日。及卒。殮於正寢。犬盤旋而號。竟夕方罷。停柩期年。犬嘗臥其側。將葬。一觸而斃。

詩箋。主沒何依淚暗吞。繞墳不住吠黃昏。賤軀豈惜酬知己。縱伴黃泉未報恩。

●大殉主【聖師錄】

劉釗。鐵嶺衛人。畜一犬。出入必從。釗嘗以馬負薪山中。犬尾之一日。犬獨歸。向釗子國。勦鳴躍不已。勦異之。隨所往。見釗爲盜所殺。棄屍石間。取其馬去。勦營葬畢。衆皆歸。犬獨守冢。日夜悲泣。淚涔涔溼草土。數日。抉土及棺。死棺旁。

鶴子曰。伏戎于莽。殆因奪馬起殺機耶。此馬甘心事讎。視主死而不顧。犬賢馬多矣。

詩箋。林下風腥馬曷歸。家人畢葬獨依依。淚痕滴處無乾土。傍家煙寒草不肥。

●黑兒像贊【宋珏作】

黑兒。崔子鎮先生所畜貓也。甚愛之。與同臥起。字之曰黑兒。則應先生每出。黑兒

忠義鑑終

必送至戶外。及歸。黑兒聞履聲。躍而喜。先生亦喜。與飲食焉。如是者十餘年。一日先生病。黑兒伏侍。不離床第。察其居止。有憂色。亡何先生沒。黑兒繞棺哀叫。累晝夜不食。而斃於棺下。先生子公超。義而葬之。名黑兒冢。予聞而驚歎。因畫其形。并爲之贊曰。相彼狸狽。性則執鼠。馴性者良。貪饕者鄙。亦有名種。深毛脩尾。溫柔善媚。依人而已。惟茲黑兒。人且難比。識主性情。解主言語。主出主歸。徘徊延佇。徘徊若悲。延佇乃喜。寢則侍衾。興則候履。歷十餘年。如僕如子。主疾知憂。歿則號毀。無以酬恩。不食而死。殉秦三良。殉齊二士。誰謂物蠢。而不可擬葬之。龍門大河之涘。陵谷有遷。冢不崩圯。庶幾千載齊名黃耳。【以上義鑑】

詩箋吁嗟古道棄如塵。生死相依幸託身。貌得狸奴毛髮動。瓣香未許負心人。

三孫徐兆杏雨壇同校
湖南張海社修五覆校

放生贖命事雖庸 無限陰功在此中
一歲積成千種福 十年培就萬重功
已赴網羅遭困厄 將投湯火近驚冲
臨刑遇赦恩無極 彼壽隆兮爾壽隆

錄壽光禪師放生詩

徐太史遺筆

貞烈鑑

民國二十四年春月上海霞飛路
護生報社營業部道德書局藏版

物猶如此卷之三

貞烈鑑目次

比翼鳳

許氏園鶴

聞鶴墮淚

孤鶴哀鳴

石鶴夜啼

鴛鴦悲鳴

柳家燕

報恩寺鶴

雌鶴表貞

◎以上貞鑑

鸞睹影悲絕

揚州署青鸞

鴛鴦投沸湯

烈燕投河

燕冢

鴈邱

雙鴈樓

鴈憤偕死

鎮江隨舟鴈

民舍鴈

銃落鳩

衛衛鶴

高郵烈鶴碑

華亭鶴

鴿鬪死

相思鳥

鄱陽烈鷄

顏氏鵝

◎以上烈鑑

增訂

光明畫集

◎每冊定價五分◎

物猶如此卷之三

三巖徐

謙鶴子編

鄭

湘靈浦校刊

貞烈鑑〔二十七案〕

愛河滔滔。溺情而死。情根正性。物乃如此。地老天荒。無終無始。輯貞烈。

◎比翼鳳〔娜嬛記〕

南方有比翼鳳。飛止飲啄。不相分離。雄曰野君。雌曰觀諱。總名曰長離。言常想離著也。此鳥能通宿命。死而復生。必在一處。

詩箋。比翼于飛。薄紫霄。預思離別恨。迢迢分明夙慧。三生在一縷情絲未盡銷。

◎許氏園鶴〔陳忠裕集〕

許氏園有二鶴。其雄斃焉。歲餘。客有復以二鶴贈者。孤鶴踽踽避之。不同飲啄也。雄鶴窺其匹。入林澗閒。意挾兩雌。儻然躡跡。則引吭長鳴。相搏擊。至舍之去。乃已。夕。雙鶴宿於池。則孤鶴宿於庭。其在庭也亦然。每月明風和。雙鶴翩翻起舞。嘹唳鳴和。孤鶴寂處不應。或風雨晦明。寒湍瀉石。霜葉辭柯。哀音忽發。有類清角。聞者莫不悲之。主人長其羽翮。縱之去。是故縉悅之操鋒刃。不能變也。鷦鳥之信寒暑。

不能奪也。九三不恆。亦孔之醜也。

鶴子曰。此陳大樽先生三嘅之一也。先生節義文章。光華宇宙。讀許氏鶴記。至今楮墨閒。凜凜挾冰霜氣。致命時。年甫四十。殆所云鋒刃不能變耶。

詩箋一般。風月各悲歡。茹苦心頭欲訴難。子影碧空何處去。故園回首暮雲寒。

●聞鶴墮淚【情史】

湘東王修竹林堂新構。太守鄭哀送雄鶴於堂。雌者尙在鄭所。霜高月冷。無夕不唳。孤客艤舟。聞者淚墮。時有野鶴飛赴堂中。驅之不去。卽鄭之雌也。交鳴頡頏。翩然並舞。宛轉低昂。妙契絃節。

鶴子曰。始則望空孤唳。霜月亦助淒清。繼而對影和聲。風雲且爲飛舞。

詩箋悲莫悲兮。生別離【古句】。生離重遇舊相知。人間倘借雙飛翼。那有徐郎破鏡悲。

●孤鶴哀鳴【搜神記】

滎陽縣南百里餘。有蘭嵒山。峭拔千尋。常有雙鶴。素羽皦然。日夕偶影翔集。相傳昔有夫婦隱此山數百年。化爲雙鶴。不絕往來。忽一鶴爲弋人害。其一鶴歲常哀鳴。至今響動嵒谷。莫知其年歲也。

鶴子曰。此雙鶴三生公案也。是耶非耶。翻何姍姍其來遲耶。詩箋。幾生修到兩胎仙。仙骨珊珊也可憐。夢覺松濤成往劫。分明雙影夕陽邊。

●石鶴夜啼【情史】

仙人尹蓬頭。還西川鶴鳴觀。乘石鶴而去。先是觀前有兩石鶴。不知何代物也。蓬頭乘其雄者上升。其雌者中夜悲鳴。土人驚怪。爭來擊落其喙。至今無喙。石鶴一隻存焉。

詩箋。一鶴空山嘯風雨。仙騎雄鶴去何所。他年雲外倘歸來。欲話滄桑石無語。

●鴛鴦悲鳴【第一功德錄】

元魏顯宗延興三年。因田鷹獲一鴛鴦。其偶悲鳴。上下不去。帝惕然。問左右曰。此飛鳴者。爲雌爲雄。對曰。臣以爲雌。帝曰。何以知之。對曰。陽性剛。陰性柔。以剛柔推之。必是雌矣。帝慨然而歎曰。雖人鳥事別。至於資識性情。竟何異哉。於是命放所獲鴛鴦。并下詔。禁斷鷺鳥不得畜焉。

詩箋。片語回春感至尊。秋江蓼影尙驚魂。而今結伴雙飛去。同拜金雞下赦恩。

●柳家燕【聖師錄】

元元貞二年。雙燕巢於燕人柳湯佐宅。一夕家人持燈照。蠋雄驚而墜。狸奴食之。

雌徬徨悲鳴不已。朝夕守巢。哺雛成翼而去。明年雌來。復巢其處。巢有二卵。人疑其更偶也。窺之。抱雛之二殼耳。自後春來。秋去。凡六載。惟見其孤飛焉。

詩箋。雙雛誰倚隻身栖。獨返家山海霧迷。故侶雖亡遺壘在。年年不忍補新泥。

●報恩寺鶴【秋燈叢話】

吳報恩寺浮圖頂。巢二鶴以游。以宿出入必俱。一日其雄。墜脛輪索中。奮翼自擲。空懸弗脫。雌下首大鳴。若籲於人。衆憐之。莫能升。遂宛轉而絕。雌依其旁。弗去。羣鳥欲磔之。輒引喙怒逐。不使近。逮毛骨盡化。然後已。風雨之夕。翱翔往復。哀鳴嗷嗷。若號慕焉。

鶴子曰。予美亡此。誰與獨處。當日痛憤之狀。激楚之音。宛在耳目間也。

詩箋。倒懸誰解望蒼冥。慘對飄輪未蛻形。自此無心更鳴埵。孤飛夜傍塔燈青。

●雌鶴表貞【聖師錄一】

秦州鹽塲蘭若樓窗外老樹顛。有鶴巢焉。雌鶴伏卵其間。村民伺雌覓食。潛以鵝卵易之。鶴不知也。久之雛破卵出。則鵝也。雄鶴訝其不類。謂雌與他禽合。怒而噪之。雌者亦鳴不已。既而雄者飛去。少頃。諸鶴羣集視其雛。咸向雌而噪。雌者無以自明。以喙鑽牆隙。死。吳野人作詩紀其事。【以上貞鑑】

詩箋。猜嫌毋乃太癡情。箇裏疑團恨未平。休笑牆茨難遽掃。女貞枝上月分明。

●鸞睹影悲絕異苑

屬賓咸。王購一鸞。欲其鳴不可致。飾金繁。饗珍羞。對之愈戚。三年不鳴。夫人曰。嘗聞鸞見其類則鳴。何不照之以鏡。王從之。鸞睹影悲鳴。冲霄一奮而絕。

詩箋。聞續鸞膠不斷絃。貞心炯炯向誰傳。明明鏡裏翩翩影。那信空花盡幻緣。

●揚州署青鸞池北偶談

雙槐歲鈔。有貞鸞烈鴛二詩。因憶昔揚州署中。有青鸞二。飲啄必俱。一日其雄爲鹿觸死。雌日夜哀鳴。不忍聽聞。數日亦死。予感其義。作青鸞操。

詩箋。嘉名疇錫果長離。五彩翩翩對舞誰。顧影生憎無賴月。記曾雙照夢回時。

●鴛鴦投沸湯聖師錄

明成化六年十月閒。鹽城天縱湖漁父。見鴛鴦羣飛。弋其雄者烹之。其雌者隨櫂。飛鳴不去。漁父方啓釜。卽投沸湯中死。

按情史記劉世用。在高郵湖。見漁者獲鴛鴦事。與此略同。

詩箋。霎時毒霧冪湖深。逐棹何人辨苦音。欣躍沸湯同畢命。碎身粉骨也甘心。

●烈燕投河聖師錄

德興夏氏子。好彈射飛禽。見梁閒巢雙燕。戲彈之。斃其雄。雌啁啾悲鳴。踰時自投。門前陂水死。時人作烈燕歌以傷之。歌云。燕燕于飛。春欲暮。終日呢喃語。如訴但聞寄淚來。瀟湘不聞有義如烈婦。夏氏狡童好游獵。彈射飛禽類幾絕。梁閒雙燕銜泥至。飛鏃傷雄當兒戲。雌燕兀兀如呆癡。不能人言人不知。門前陂水清且泚。一飛徑溺澄瀾底。傷哉痛恨應未休。安得化作呂氏女。手刃斷頭報夫仇。

詩箋。倦羽脩脩喜乍依。喪羣白恨闇先機。孤魂不逐流波逝。猶傍空梁故壘飛。

●燕冢【南史】

襄陽衛敬瑜早喪。其妻灞陵王整妹也。年十六。父母舅姑咸欲嫁之。泣而不許。截耳置盤中爲誓。乃止。戶有燕巢。常雙來去。後忽孤飛。女感之。謂曰。能知我乎。因以縷誌其足。明年復來。孤飛如故。猶帶前縷。女吟詩曰。昔年無偶去。今春猶獨歸。故人恩義重。不忍復雙飛。燕春來秋去。殆七霜矣。後復來。女已死。燕繞舍哀鳴。人告之葬處。卽飛就墓。哀鳴不食而死。因葬其傍。曰燕冢。唐李公佐有燕女墳記。【此案可入貞鑑亦可入眷舊】

一說姚玉京嫁襄州小吏衛敬瑜。衛溺死。玉京守志。常有雙燕巢梁閒。爲鷺鳥所獲。其一孤飛悲鳴。徘徊至秋。翔集玉京之臂。如告別然。玉京以紅縷繫其足。

曰。新春復來。爲吾侶也。明年果至。玉京作詩云云。後玉京卒。燕復來。周迴悲鳴。家人語曰。玉京死矣。墳在南郭。燕至墳所亦死。每風清月皎。或見玉京與燕同游灞水之上焉。或云。玉京卽王氏乳名。加姚者。從母姓也。

李斯義曰。玉京與燕。可稱雙節。贈詩哀婉。讀之淚下。

鶴子曰。燕傍玉京墓而死。此碣信可標雙節冢矣。顧一則填海之石。虛銜一則覆盆之窻。未雪空梁。月淡幽閣。燈寒此六七年閒。相對清况。雖各深懷抱。而恩義之感均也。洎乎秋風一別。春社重來。舊壘依然。故人安在。蕭蕭白楊之郭。依依紅縷之情。後死者何以爲懷哉。

詩箋孤壘空房各自哀。分飛猶幸聚泉臺。回頭無限春風淚。不許桃花傍冢開。

●鴈邱【情史】

元遺山。金人常赴試并州。道逢捕鴈者。捕得二鴈。一死。一脫網去。其脫網者。空中盤旋哀鳴良久。亦投地死。元遂以金贖得二鴈。瘞汾水旁。壘石爲識。號曰鴈邱。因賦摸魚兒詞云。問世閒情。是何物。直教生死相許。天南地北。雙飛客。老翅幾回寒暑。歡樂趣。別離苦。就中更有癡兒女。君應有語。渺萬里層雲。千山暮雪。隻影向誰去。橫汾路。寂寞當年簫鼓。荒煙依舊平楚。招魂楚些。何嗟及。山鬼暗啼風雨。天也。

妬未信與鶯兒燕子俱黃土。千秋萬古爲留待騷人。狂歌痛飲來訪鴈邱處。樂城
 李仁卿治和云。鴈雙雙。正分汾水。回頭生死殊。路天長地久相思債。何似眼前俱
 去。摧勁羽。偷萬一幽冥。卻有重逢處。詩翁感遇。把江北江南風。嘹月唳。并付一邱
 土。仍爲汝。小草幽蘭麗句。聲聲字字酸楚。桐江秋影。今何在。蕭瑟欲迷隄樹。露魂
 苦。算猶勝王嬙青冢真娘墓。憑誰說與對烏道長空。龍艘古渡。馬耳淚如雨。
 李斯義曰。或曰。此情癡也。不知至忠大孝。俱是癡拙人。做出敗節喪名。卻被聰
 明人做盡。癡是其真誠一念。可以扶植萬古綱常。卽所謂其愚不可及也。
 鶴子曰。原跋妙矣。燕冢鴈邱。天然佳對。而玉京之詩。贈於生前。遺山之詞。唁於
 死後。南郭橫汾。輝映千春矣。空中盤旋良久而死。試度其心。一似悔恨其脫網
 而獨去也者。悲夫。

詩箋。片碣苔花古墨香。勝他瘞玉白楊旁。至今秋影荒蘆畔。雙照汾河舊夕陽。

●雙鴈樓【聖師錄】

王天雨云。予舍後有張姓者。獲一鴈。置於中庭。明年有鴈自天哀鳴。庭鴈和之。久
 而天鴈遂下。彼此以頸絞死於樓前。後名其樓曰雙鴈樓。此正德閒事。
 詩箋。一別茫茫兩度秋。悲嘶幾盡白雲求。斷魂不得雙飛去。煙黯空庭月黯樓。

●雁憤偕死〔情史〕

宏治閒。河南虞人獲一雌雁。鍛其翼。畜諸場圃。以媒他雁。每見雲中飛者。必仰睇。至次年來賓時。其雄與羣雁飛鳴而過。雌認其聲。仰空號鳴。雄亦認其聲。飛落圃中。交頸鳴鳴。若相哀訴者。良久。其雄飛起半空。欲去徘徊。視其雌不能飛。復飛落地上。旋轉叫號。聲益悲惻。如此者三四回。度終不能飛。乃共嚙頸蹂蹴。遂相憤觸而死。

按聖師錄。記顧敬亭稼圃旁。羅者得一雁。其偶聞聲落地。交頸哀鳴。血盡而死。事絕相類。

詩箋。仰霄無計奮雲端。幾度徘徊去就難。義不獨生誓同死。當天曠日照心肝。

●鎮江隨舟雁〔警心錄〕

萬歷癸丑。鎮江錢參將部下。有卒獲一雁。籠置舟尾。空中有一雁隨舟悲號。舟中雁連聲應之。江行百里。不肯暫捨。將登岸。籠中雁伸頸向外大呼。空中雁忽下。二雁以頸相交。不放。舟中人異之。亟向前擘開。已俱死矣。錢聞大怒。同舟兵卒各杖之。其獲雁人病月餘死。

李斯義曰。昏禮親迎奠雁。雁順陰陽往來。且不再偶。和且信也。和則不離。信則

不二。故共飛鳴。同生死。於此可識倡隨之義。

鶴子曰。隨舟而空際悲號者。雌耶。雄耶。雄則義。夫。雌則烈。婦。其連聲相應也。迫乎有生離之慘。其近岸大呼也。岌乎有死別之悲。語云。死或重於泰山。或輕於鴻毛。此則鴻毛而重於泰山矣。

詩箋。百里隨舟不暫違。死時交頸兩依依。長江有盡情無盡。悔傍蘆花淺水飛。

●民舍雁【聖師錄】

王一槐司鐸銅陵時。言有民舍。除夜燎煙。祓除不祥。一雄雁觸煙而下。家人以爲不祥也。烹之。明晨一雁遶鳴檐上。數日墮地而死。

鶴子曰。忍作殘害。是爲不祥。

詩箋。無端虐燄誤戕身。香徧屠蘇慶歲新。鼎鑊殘魂應待妾。願隨金谷墜樓人。

●銃落鳩【矩齋雜記】

老友陳大介嘗館山家。見獵人銃落一鳩墜地。又一鳩來就拊視。且口銜他物飼之。不受。又以翼水蘸其火傷處。卒不可活。乃宛頸哀鳴而去。有頃從樹下墜觸地死。蓋重傷其匹也。陳引其人諫曰。若中一鳩而二鳩死。鳥且死。義若獨何心。其人遂折銃改業。

施愚山曰。此與獲鹿子。而鹿母腸寸斷相類。彼重母子。此重夫婦。

鶴子曰。試想瞥見其匹傷銃墜地時。正爾雙栖。火光迸射。肝膽何等驚裂。心口何等急籌。萬苦中沸。莫可言狀。然後銜物拊視。意望其匹之起死回生也。而不效。既而四顧徬徨。不惜濡翼。意猶望一絲之或生也。而又不效。死之志已斬然。於宛頸哀鳴頃矣。既去之後。未墜之先。此一霎閒。孤立樹杪。下視痛絕。聲也無淚也無矣。噫。

詩箋。百計求生無望矣。傷心慘目。竟如此。到頭死別勝生離。地下重逢悲又喜。

●衛衙鶴【聖師錄】

衛衙梓巢鶴。父死於弩。頃之。衆擁一雄來。匹其母。母哀鳴百拒之。雄怒。盡啄殺其四雛。母益哀憤。氣哽而死。羣凶乃挾其雄逸去。

詩箋。杜老曾歌義鶻行。雄心芒角莽崢嶸。忍教孤寡齊吞盡。萬樹陰風獵獵生。

●高郵烈鶴碑【聖師錄】

高郵州有鶴。雙棲南樓上。或弋其雄。雌孤栖旬餘。有羣鶴偕一雄與共巢。若媒誘之者然。竟日弗偶。遂皆飛去。孤者哀鳴不已。忽鑽嘴入巢隙。懸足而死。時游客見之。無不嗟訝。競爲烈鶴詩。弔之。復立烈鶴碑。

詩箋。風雨南樓子處哀。羣雌粥粥浪疑猜。墨花一片韓陵石。消受詩人下拜來。

●華亭鶴【聖師錄】

華亭董氏庭前植虬松一株。枝幹扶疎。亭亭如蓋。有雙鶴結巢其顛。後雄被彈死。其雌子然獨處。日夕哀鳴。越數日亦死。

詩箋。風捲濤飛月墮天。金丸無計避韓嫣。雙棲不羨華亭鶴。繞樹孤飛唳碧煙。

●鴿鬪死【聖師錄】

江浙平章巉巉宅。養二鴿。其雄斃於狸奴。家人以他雄配之。憤鬪而死。謝子蘭作義鴿詩以弔之。云。翩翩雙飛奴。其羽白如雪。烏員忽相殘。雄死雌躑躅。絕食累數日。悲鳴聲不歇。蒼頭配他偶。捍拒項流血。血流氣亦憤。血盡氣乃絕。嗟爾非鴛鴦。天配不再結。嗟爾非睢鳩。所性殊有別。於人擬共姜。之死同一轍。奈何閨壺內。往往少貞烈。夏姬更九夫。河閒不堪說。聊爲義鴿行。以激夫婦節。

詩箋。血灑雪衣甘鬪死。心懸天日忍偷生。援琴漫撥求凰引。聽否悲吟義鴿行。

●相思鳥【聞見偶錄】

相思鳥產於蘇屬近海諸處。閩中亦有之。大與瓦雀等。紅喙黃綠羽翰。其形甚妍。聲小而韻。飛則並飛。止則同止。每於秋季。鄉人羅而取之。以鬻於市。愛者畜以雕。

籠籠分二格。鎖其一。其一放之不去。時飛翔於籠之左右上下。頃亦自歸籠內。若失其一。其一悲鳴亦死。殆比翼鳥之流歟。

鶴子曰。情史云。紅蝙蝠出瀧州。皆深紅色。唯翼脉淺黑。多雙伏紅蕉花閒。探者若獲其一。則一不去。又嶺南有紅飛鼠。出入必雙。人獲其一。必雙得之。又周索孝子傳云。蝮蝮屬。或黃或黑。通臂。輕身。善緣。能於空中轉輪。好吟。雌爲人所得。終不獨生。吁。蠓蝸微物。亦知一與之齊。終身不改之義乎。

詩箋。朝朝暮暮苦相思。思到魂銷欲盡時。心有千行萬行淚。何能說與主人知。

鄱陽烈雞【警心錄】

王楫鄱陽卜者。邸中畜雌雄二雞。雌正抱雛。適客至。楫命童取其雄。將烹之。雄叫呼。雌聞聲走至。孜孜注盼。哽咽悲鳴。若欲訴楫而免雄之死者。楫弗悟。竟殺之。雌躑躅哀鳴。不復顧羣雛。終夕唧唧不食。凝立砌下。沈沈如醉。少焉氣溢其吭。遂喘而死。

李斯義曰。竟有生同室。死同穴之意。

鶴子曰。寫其雌急迫痛切情狀。由有聲而無聲。字字驚心動魄。

詩箋。求生不得枉號呼。割愛何心顧衆雛。如醉如癡滿腔恨。可憐到死尙模糊。

●顏氏鵝【警心錄】

慶元三年有客離榷場赴淮至顏氏店顏語其妻明日宰雄鵝餉客夜聞柵中羣鵝悲鳴迨旦取鵝羣鵝向前啄顏衣遮繞不退顏攜杖擊散竟殺其雄其一雌二雛皆悲躍而死羣鵝舉翅拍地自撲七日不飲水食穀（以上烈鑑）

李斯義曰呂子云疾痛相救憂思相感死則相哀此之謂骨肉之親物亦有同然者故聞其難也羣相救護其不可救也或以死殉或悲傷至不飲食至若父子不相救親戚不相弔則人處物類下矣

鶴子曰雌之死也爲烈婦雛之死也爲孝子同羣之自撲也爲義友而託足於戾氣之門惜哉怨毒循環何時了結

詩箋雛隨母死婦隨夫同類摧腸絕復蘇釜繞游魂齊掩泣旁觀談笑動心無

我身爾身 爾肉我肉 大德曰生 與爾並育

錄清彭紹升戒殺箴

貞烈鑑終

三孫徐兆杏雨壇同校
湖南張海祉修五覆校

徐太史遺筆

慈
愛
鑑

民國二十四年春月上海霞飛路
護生報社營業部道德書局藏版

物猶如此卷之四

慈愛鑑目次

鹿慟子腸斷

鹿胎草

孕鹿哀跪

鹿母悲鳴

麀愛子

麀母隨號

象泣子

猿乞子

猿號追子

猿遺乳

猿垂死乳子

老猿悼子

猿哀子不食

聞牛鳴

羊慟羔自擲

羊乞產後死

溺女感化

犬埋子骨

豚媪哭聲

狙指腹

鼠狼救子

鶴隨雛死

鶴自拔斃

燕痛雛墜

慈鶯一

慈鶯二

兔母鶴悲傷

鳥帶箭喂雛

黃衣女乞兒命

鷄囑兒女

雙鯉救子

鱧護子

魚乳

魚爲子貸命

蠍蝟

◎以上慈愛鑑

物猶如此卷之四

三巖徐 謙鶴子編 鄭 湘靈浦校刊

慈愛鑑【三十五案】

閩楚溺女。吳越焚子。骨肉自戕。天怒未已。母曰禽犢。真性泮髓。輯慈愛

鹿慟子腸斷【警心錄】

許旌陽少好獵。一日射死一鹿。鹿母爲子舐瘡痕。良久亦死。剖腹視之。腸皆斷矣。卽大悔悟。折其弓。入山修道。後證仙果。

李斯義曰。一悔便可入道。人苦不知悔。果能悔而改。其造詣自無所不至。鶴子曰。良久兩字中多少心淚。

詩箋。殺心放下卽仙心。慘聽哀鳴淚不禁。沈痛盡頭共兒死。此情無古亦無今。

鹿胎草【人譜類記】

陳惠度於剡山射一孕鹿。旣傷。產下小鹿。以舌舐子身乾。而母乃死。惠度見之。慘然。遂棄弓矢。爲僧。建惠安寺。嵎縣東。鹿死處生草。曰鹿胎草。

詩箋。舐兒痛恨徹心頭。禮懺蓮臺悔未休。芳草萋迷埋鹿處。斑斑猶有淚痕流。

●孕鹿哀跪【警心錄】

邵文立。梁時人。世業烹屠。欲殺一鹿。鹿懷甕當產。就庖哀切。跪而流淚。文立以爲不祥。割割之。旋身患惡瘡。乃自悔。責傾居產。建小莊嚴寺焉。

詩箋。不恤充庖。念子哀血飛霜。刃已戕胎。誰知哽咽。心頭語。跪懇屠前。怒未回。

●鹿母悲鳴【警心錄】

章邵。富而貪。出遇鹿。鹿避去。獲其子。撲殺棄林中。鹿母遙見。悲號不已。是日邵欲有所謀。一子甫弱冠。先父行倦而假寐大樹下。以伺父。邵至見衣襖。抽刀刺喉。却取而行。漸曉視衣襖。乃知殺者其子也。悲號痛悔。已無及矣。

鶴子曰。殺鹿子。卽殺其子。天道報施。不俟終日。可畏哉。此人立心貪狡。平居卽有勸以苦報。勢必悍然不信。卽苦報臨頭。且以爲命數當然。烏知厲魄之不汝宥哉。

詩箋。滿腔殺氣。莽縱橫。不到兒亡。氣不平。轉盼殺人。還自殺。林中未斷鹿悲聲。

●麀愛子【宣室志】

廬陵吳唐。好射獵。矢無虛發。時方春煦。率其子出獵。值一麀與甕戲。乍見唐。引甕潛去。甕未知畏也。躍而前。唐射殺之。麀驚還悲鳴。唐置甕於地。自藏茂草中。麀來

舐覺。又射之。既而又一塵至。方張弩。箭忽自發。中其子。唐投弩。抱子。撫膺而哭。忽聞空中呼曰。吳唐。塵之愛子。與爾何異。驚視。聞忽有虎。突出搏唐。折臂而死。

鶴子曰。風和日麗。引覺嬉春。是何活活潑潑世界。吳唐殺心一動。忽變爲慘霧。陰霾。子之中箭也。鬼之呼空也。虎之突搏也。真覺觸處爲難。無處躲避。

詩箋。抱子號咷。首試回弩。機未發。萬靈哀葉飛。谷動風悲。嘯鬼導山。君白日來。

●覺母隨號【警心錄】

孟孫獵得覺。使秦西巴持歸。覺母隨之而號。西巴不忍。縱之。孟孫怒。逐西巴。居一載。取以爲其子傅。左右曰。西巴有罪。今以爲子傅。何也。孟孫曰。秦西巴以一覺而不忍。又能忍吾子乎。

詩箋。乾坤萬古不銷沈。只此慈悲一寸心。誰放西巴仙佛手。空山目送淚涔涔。

●象泣子【蔣濟萬論】

象見子皮。而無遠近必泣。

詩箋。毛裏相關豈暫忘。皮存子死九迴腸。老來不盡西河淚。千古酸心慟樂羊。

●猿乞子【搜神記】

臨川東興人入山得猿子。挈歸。猿母隨逐至家。此人縛猿子於庭樹。示之母。遽搏。

頰。向人若乞哀狀。終不肯放。竟擊殺之。母悲啼自擲而死。破腸視之。寸寸斷裂。未半年疫起。其家滅門。

顏光衷曰。不忍一麀。可以爲傳。則忍此猿者。尙可爲人乎。抑又有感焉。母子天性。其懇怛一脈。寄在畜生道中者。猶能感動疫鬼。况寃人乎。况仁人孝子精氣之所勃窣所會。鍾而不興。雲澍雨裂。石貫日者乎。

詩箋。乞子猿哀。顛搏庭。忍看并命血風腥。霎時樹杪陰雲合。恍惚虛空怒百靈。

●猿號追子【傷心錄】

桓溫入蜀。至三峽中。有得猿子者。其母緣岸哀號。行百餘里不去。遂跳至船。至便氣絕。剝取其皮。因見腹中腸皆寸寸斷。桓聞之怒。命黜其人。

鶴子曰。至便氣絕。慘痛莫狀。

詩箋。百里追兒徑躍航。峽雲陰慘不飛揚。沾裳只聽三聲耳。啼到無聲聲更長。

●猿遺乳【傷心錄】

一彭姓善弩。入山見隔溪老猴方乳兒。發弩射之。中傷其臂。猴知不能支。勉抱子飽食其乳。猶摘木葉數片。盛餘乳置子旁。聲嗚嗚然。若教子取食狀。大號而絕。諸子環視。亦嗚嗚而號。跳不已。

詩箋。念乳無多。暫止饑。相看含淚兩歔歔。秋風也似悽情甚。不忍溪頭捲葉飛。

●猿垂死乳子【警心錄】

武平產猿。毛若金絲。閃閃可觀。猿子尤奇彩。性馴不離母。母黠不可致。獵人以毒。傅矢伺母。閒射之。母度不能生。灑乳於林。飲子。灑已氣絕。獵人取母皮。向子鞭之。卽悲鳴而下。歛手就制。每夕必寢。皮乃安。甚者抱皮跳躑而死。

李斯義曰。生死惓戀。慈孝之至。欲縛其子。而先射其母。莫忍於此矣。

詩箋。毒矢相加。顧子悲藏。身無計。誤金絲。乳中滴滴。心頭血。腸斷慈魂入夢時。

●老猿悼子【南史魚復侯子響傳】

齊武帝於華林。爲子響作齋。嗚咽移時。左右莫不掩涕。他日出景陽山。見老猿遠擲。悲鳴後堂。丞曰。猿子前日墮崖死。其母求之。不見。故爾。上因憶子響。歔歔良久。不自勝。

鶴子曰。嗚咽耶。擲鳴耶。涕不知其何以淫淫耶。情不知其何以不自勝耶。人耶。物耶。同耶。獨耶。

詩箋。悼子崖顛。骨未收。聞猿駐驛。幾回頭。景陽山畔。秋蕭瑟。水咽雲低。各自愁。

●猿哀子不食【合璧】

昔人有畜子母猴者。一日鳶殺其子。猴哀鳴不食。徑往廚中取一片肉戴頂上。伺於庭中。鳶果來搏肉。猴兩手撻擊其翅。嚙腦食髓。

詩箋。隻影淒涼。老淚垂。啼聲不斷。自忘飢。區區一鬻償兒命。快絕猿心痛絕時。

●聞牛鳴【左傳】

介葛盧聞牛鳴曰。是生三犧。皆用之矣。其音云。問之而信。

鍾伯敬曰。慧人一語。使人怵然不敢言殺。不待慈氏下生說法勸解也。韓范曰。介葛盧識獸音。佛圖澄識鐸音。物理之通。有不可測者。學究家莫以目所未見爲怪。

詩箋。悔生駢角失團圞。哽咽人前欲訴難。回首三犧成往事。可憐老淚尙闌干。

●羊慟羔自擲【同生錄二編】

宋真宗祀汾陰日。見一羊自擲道左。怪問之。左右對曰。今日尙食殺其羔。真宗不樂。自是不殺羊羔。

鶴子曰。冊府元龜云。貞觀十八年。幸九成宮。行次顯仁宮。太宗手詔皇太子曰。吾昨見麋鹿懷孕者多。縱有空身。其子甚小。母亡而子存者。未之有也。昆蟲無知。惟推己以及也。又甲申雜記云。御廚進羔兒肉。宣仁曰。方羔而烹之。傷天折。

也。卻而不食。有旨不得宰羊羔以爲膳。又同生錄云。明太祖當齋時。禮部尙書牛諒言。古禮凡大祀齋日。宰犢牛爲膳。以助精神。太祖曰。太牢非常用。致齋三日而供三犢。所費太多。夫儉可以制欲。淡可以順性。若無節制。惟事奢侈。徒增傷物之心。無益事神之道。諒曰。周禮古人所定。非過侈也。太祖曰。周官之法。不行於後世多矣。惟自奉者。乃欲法古何哉。吁。仁君愛物之心如此。大哉。王言培養國家元氣不小。

詩箋。黼幄推恩軫物情。道旁羊擲訝哀鳴。玉盤片片羔兒肉。暗有慈魂哭子聲。

●羊乞產後死〔昨非菴日纂〕

白龜年曾入仙洞得素書。能辨禽獸語。一日過潞州。太守知其能。延與之談。適將吏驅羊三十羣過庭下。中一羊鞭之不肯行。且悲鳴。守曰。羊有說乎。龜年曰。羊言腹中有羔將產。俟產訖甘就死。守乃留羊驗之。既而果生二羔。

李斯義曰。禽獸語卽不能辨。而其喜其哀可立辨也。物愛其胎。與人何異。故於物之有胎者。宜更加憐惜。

詩箋。人羊轉轂詎荒唐。爭羨盈庖李贊皇。休怒行遲鞭見血。爲兒一步一迴腸。

●溺女感化〔廣信府志〕

弋陽方家墩吳某。犬生數子。令其僕攜溺諸河。僕私烹之。犬躡僕後。目睹其狀。號叫酸悲。以頭觸柱而死。村婦曰。彼犬也。而猶愛其子。况於人乎。溺女之風漸熄焉。詩箋母魂慘慘繞刀盤。溺女滔滔欲挽難。休薄吳兒心木石。村姑片語且迴瀾。

●犬埋子骨【述異記】

宋元徽中。石元度畜一黃犬。生子色白。母愛憐異常。每銜食飼之。及長。元度出獵未歸。犬母必門外望之。後元度患氣嗽。漸危篤。醫云。須白犬肺湯。索諸市。不得。乃殺白犬。取用其肺。犬母跳躍號叫。累日不息。其家人烹犬與客食之。投骨於地。犬母輒銜置空房中。旋移後園桑下。掘土埋之。日夕向樹哀吠。而元度疾竟不瘳。未終時。謂左右曰。湯不救我疾。枉殺此犬。其弟法度自此不食犬肉。

李斯義曰。楚靈王聞羣公子之死也。自投車下。讀此知愛子之情。人物同也。

鶴子曰。呂氏春秋云。昔趙簡子臣陽城渠胥有疾。醫謂得白騾肝則生。不得則死。簡子殺所愛白騾剖肝予之。與元度病烹犬相類。渠胥之疾瘳與否不可知。而元度因之而死。世之治病者。慎勿輕視物命。反傷人命也。元度臨終枉殺一語。莫作嚙語看。當知冤報。人物無殊。其告左右也。大有痛自悔恨之心。此必眼光落地時。確有所見而云然者。

詩箋埋骨荒園桑土新。幾回銜飼歷酸辛。怕揮老眼思兒淚。滴到黃墟草不春。

●豚媪哭聲【迪吉錄】

唐果毅鄆縣人。客來恆買豚設饌。衛士家生十豚。俱買盡。其最後買者。煮尙未熟。果毅對客坐。忽聞婦人哭聲。意疑其妻。向家視之。不哭。至廳。又聞哭聲。視妻復不哭。如此數回。後更向家。卽聞哭聲在門外。在門外卽聞哭聲在家中。其客大驚。不安席。細聞哭聲。似云。男女生十箇。都被果毅吃盡。聽之了了。惻然皆散去。果毅驚而得病。數旬而沒。長安共傳其事焉。

鶴子曰。古德云。欲知浩劫從何起。且聽屠門夜半聲。似此陰陰慘慘。真是滿門殺氣。鬱蒸分餉者衆客。尋債者一身。試問那時苦况。有座客替汝否。

詩箋。彭生豕立逐輿啼。媪哭豚兒更慘悽。說與老饕渾不信。啖車翻笑易無稽。

●狙指腹【湘山野錄】

南唐李後主獵青龍山。一牝狙觸網。見主。兩淚稽顙。指其腹。戒虞人保守。是夕誕二子。還幸大理寺錄囚。繫有大辟婦。以孕在獄。未幾誕二子。主感狙事。罪止於流。鶴子曰。狙性詐。而愛子情何摯也。李雖亡國主。而全狙之生。盡物性矣。感狙而曲全孕婦。盡人性矣。一念慈祥。有時流露。孰謂叔寶無心肝哉。

詩箋。敢同暮四與朝三。但乞生兒死亦甘。解網主恩同感泣。一時佳話徧江南。

⑤ 鼠狼救子【北夢瑣言】

相國張文蔚莊在東都北坡。莊有鼠狼穴。養子四。爲蛇所吞。鼠狼雌雄情切。乃於穴外坩土。恰容蛇頭。伺蛇出穴。入所坩處出頭。度其迴轉不及。當腰齧斷。而孽蛇腹銜出。四子尙有氣。置穴外。銜豆葉嚼而傳之。皆活。何微物而有情有智如是乎。

鶴子曰。情急智生。破涕爲笑矣。不知四子他日亦念及此時親恩否。

⑥ 鶴隨雛死【警心錄】

鴈門遠法師。廬山高僧也。未出家時。善弩射。嘗於鶴巢射獲其雛。後復伺鶴母。將殺之。鶴不動。登樹觀之。已死巢中。疑其愛子致死。剖視之。腸寸寸絕。師於是放弩發菩提心。遂通慧識。

李斯義曰。子母恩情。皆從肺腑流露。故子死母亦死。腸寸寸絕。觀此知父母恩重。而人之漠然於怙恃者。真堪愧死。

鶴子曰。許旌陽折矢而證仙果。僧慧遠放弩而通慧識。頓悟則立地仙佛。不悟則歷劫沙虫。嗚呼。茫茫殺業。回首者幾人哉。

詩箋。尙餘殘淚點松梢。母子悲魂聚舊巢。月白東林蓮漏靜。心頭悔恨未全拋。

●鶴自拔髦【警心錄】

大業二年。太守何稠。課州縣送羽毛。民爭捕。殆無遺類。烏程縣人入山捕採。見一大樹高百丈。上有鶴巢。養子欲取之。高不可上。操斧將伐樹。鶴知人必取。恐殺其子。乃自拔髦毛。片片投地。

李斯義曰。嗟乎。厚蓄以致傾喪者。世不乏人。觀此知散財爲保身之要也。

鶴子曰。上官誅求無藝。飛檄所到。急如星火。不特民懼其殃。抑且物流其毒。念之哉。

詩箋。種穰戢影老巖阿。無術將雛避斧柯。願捨己身全子命。喜心比似怨心多。

●燕痛雛墜【泉南雜記】

閩之遠海。近番處。有燕名金絲者。首尾似燕而甚小。毛如金絲。臨卵育子時。羣飛近沙。汐泥有石處。啄蠶螺食之。蠶螺背上肉有兩筋。如楓蠶絲。堅結而白。故此燕食之。肉化而筋不化。并津液嘔出。結爲小窩。附石上。久之與小雛鼓翼而飛。海人依時拾之。故曰燕窩。而予近聞之漳人。殊不然。大海中有高山。冬月羣燕來巢。其上春取小魚。累之窩中。人取之林中。窩毀子墜。顛覆闌干。燕之雌雄。羣然悲鳴。傷

物特甚。嗚呼。誰謂燕窩蔬房哉。生命之苦。過火燔刀割矣。蘇長公謂雖八珍之美。投箸而不忍食。此物此志耶。

詩箋。海山巢覆燕同悲。鬻子恩勤亦閔斯。七箸尙縈陰慘氣。腥風搖燭綠迷離。

●慈鶯一【同生錄二編】

吳遜客陪侍御苑。有取小金衣者。母聲慘噪。還之乃息。紀詩云。不念飛禽愛子情。綠陰深處捕雛鶯。可憐調舌綿蠻韻。變作驚心痛裂聲。要識放覺堪託子。須知渡蟻得延生。還渠子母融融樂。禁苑須教莫浪驚。

鶴子曰。教兒調舌。是天地生機。失子驚心。是天地殺機。生與殺機甚微也。前人
有詩云。勸君莫打三春鳥。兒在巢中望母歸。讀之悽切動人。昨非菴詩云。鳥鵲
哺雛時。萬分心愛護。一啄十餘呼。一飛十餘顧。辛苦養將成。幕被罟師捕。哀鳴
及追逐。我不忍聞睹。屠赤水戒殺詩云。物我從來本一真。幻形分處不分神。如
何共嚼孃生肉。大地哀號慘煞人。吁。普願有情人。不惜隨緣爲罟師。垂涕而誦
之。是亦廣長舌也。

詩箋。睨腕聲和侑玉卮。宮娥笑打小黃鸝。煙花還我春無限。母子枝頭話別離。

●慈鶯二【太平廣記】

有人取黃鶯雛養竹籠中。其雌雄接翼。曉夜哀鳴於籠外。時來哺之。見人略無畏怖。一日移雛他籠。置密室。雌雄銜食至。瞥見空籠。繚繞飛鳴。一投火中而死。一觸籠而死。

鶴子曰。哀哉雌雄。憐子痛子。竟至於此。想見寸腸慘裂。慈魂雙繞。心猶含痛也。詩箋。此恨綿綿死未平。爲兒激烈太傷情。金衣公子心悲否。無復爺孃喚汝聲。

◎免母鶴悲傷【警心錄】

太倉劉家河天妃宮永樂時建。一日僧自外歸。見釜煮二卵。問從何來。童曰。於鶴巢取之。僧命還巢中。童曰。卵已熟矣。還之無生理。僧曰。豈望其生。但免母鶴悲傷耳。越數日。忽出二雛。僧異焉。令童探巢。果卵生也。巢內一木尺許。五色錯文。香風馥郁。持下供佛前。後倭舟避風泊河濱。入寺見木。願酬白金五百。僧與之。數年倭復入貢。訪前僧死矣。僧徒問香何寶。曰。此香焚之。死魂還體。聚窟洲所出返魂香也。

李斯義曰。免鶴悲傷一語。不忍讀。貪彼微利。喪我至寶。世人往往如是。子罕曰。我以不貪爲寶。則不貪便是至寶。安論返魂香哉。

鶴子曰。二雛於沸湯裏重生。母喜出望外。不知何似。巢中仙香。殆留之以酬老

衲耶。惜僧雛未試於其師。圓寂時也。

詩箋。縱非完卵。免親傷。三復僧言。意味長。安得衆生無天札。不煩更覓返魂香。

●鳥帶箭喂雛【同生錄二編】

鄧艾征涪陵。見一鳥喂雛。挾矢射之。箭初發。鳥驚避。以諸雛尙在。不忍遠飛去。再發中之。鳥帶箭分喂其雛。復銜餘脯在側。若教子取食。然哀鳴而氣絕。諸雛環視。亦俯仰哀鳴不已。艾大悔曰。我違物性。殆不久人世矣。

鶴子曰。警心錄載艾征涪陵。見猿抱子在樹中。以弩其子。拔箭捲樹葉塞之。與同生錄異。然一慈一孝。並足風世。

詩箋。驚絃欲避。顧雛栖。帶箭驚惶。意慘悽。至竟英雄回首易。悔心幾個鄧征西。

●黃衣女乞兒命【警心錄】

衢州里胥。催租民家。貧無以備餐。有伏雞擬烹之。里胥恍惚閒。見桑下黃衣女子。向前乞命。且曰。自死不足惜。不忍兒子未見日光耳。胥驚異。至屋側。見一雞伏卵。其家將宰。力沮之。後再來。雞乃抱雛。見胥踴躍似感恩狀。既去。行數百步。一虎猝躍出。忽一雞飛撲虎眼。胥獲免。

鶴子曰。胥如虎而動惻隱。虎心善矣。不然。難逃真虎口也。是雞靈幻莫測。真慈

母真俠士。

詩箋。片念仁慈轉殺機。伏雌誰遣幻黃衣。柔腸兒女尋常事。不料雄心奪虎威。

◎雞囑兒女【勸誡類鈔】

常熟一差役。催糧於鄉。宿旅舍。聞鄰嫗囑兒女曰。明晨主人烹我餉官。差我死後。爾曹各自小心。門檻內外不可停。主人足下不可去。次日。差挨戶催糧。值鄰家供膳。縛母雞已操刀矣。雞遶母悲鳴。差亟前曰。止。爾將母雞及羣雛與我放生。我代爾完糧。鄰家欣然與之。後數年。差投三峯寺出家。長老曰。汝果實心削髮。須求本寺衆僧。絕火三日。方留汝。差遍懇衆僧。滿三日。出門取火。忽猛虎當門。衆僧怨之。差曰。大衆既爲予忍餓三日。今甘死。待予往。出門取火。虎不爲害。後悟道證果。

◎附錄

廣信府志云。興安胥鄭某。往鄉催糧。夜宿。似聞隔壁人語曰。我明當就烹。若輩幸自愛。無擾害人。諦聽之。咿咿喔喔。乃雞母與小雞語也。清晨謂主人毋宰雞。餉我。幸饋以生。胥得雞去。至岑山。雞奮飛入洞。胥迹之。見白金布地。喟然曰。天賜我乎。我安置此。遂建橋修路。力行善事。棄家爲僧。守戒律終其身。

詩箋。蠹吏回心便好人。雞窗絮語豈前因。餘生虎尾掉頭去。笑悟碧空身外身。

●雙鯉救子【迪吉錄】

吳江人劉子嶼。有魚塘一所。至冬築小堰以放塘水。竭澤取魚。水放將半。見二大鯉。越出堰外。復躍入。如此再三。子嶼異之。觀所至。乃新育小鯉數百尾。聚一窟中。不得出。故二鯉往來跳躍。且銜且涉。而救其子。雖身陷死地。不恤也。子嶼愀然歎息。乃去堰放魚。越二年。鋤地得金。遂至鉅富。

顏光衷曰。天地閒。只是此有情種。到處堪憐。堪痛。被二鯉活活畫出仁人孝子之脈。橫溢四海矣。

鶴子曰。彭尺木南園放生池碑銘云。勿謂是魚。其形甚細。苟含生性。天地同氣。又云。爾有室家。魚有妻子。相啣相濡。至於沒齒。讀此使人猛發慈悲心。

詩箋銜兒騰出幾。踟躕盡室難。依丙穴居。同隊不須過。河泣主恩波。及到枯魚。

●鱧護子【傷心錄】

學士周豫家嘗烹鱧。見有鞠身向上。以首尾就烹者。訝而剖之。腹中纍纍有子。乃悟物類之甘心忍痛。而護惜其子如此其至也。

俞仲寬曰。經言一切畏刀杖。無不愛壽命。故驚禽投案。望救魏君。窮獸入廬。求生歐氏。近者聞周學士烹鱧事。益歎有生愛戀其情可憐。嗟乎。當其被擒執時。

旁見親聚。欲戀不得。抱苦就終。含悲向盡。或慘受屠割。或生投鼎沸。種種痛苦。徹入骨髓。思之毛豎。言之魂驚。今人或見自家兒女。小有損傷。便言痛苦。至於殺物。則恣意慘毒。了無悲憫。何不想之甚也。

劉念臺先生人譜云。鱸名護子魚。仁人不忍食之。試觀沸湯慘痛時。尙舍身護子。若是食者快心。讀者酸鼻矣。故烏菴道人詩云。有命盡貪生。無分人與畜。魚鼈無聲類。見死瞪兩目。掙命砧几閒。張口不能哭。死猶護其子。鱸烹將身鞠。又昔人戒殺瑣咏曰。毋謂動物蠢。愛生同吃緊。黑魚惜其胎。曲腰就湯殞。蓋謂此也。

詩箋。饗人鹽豉久調和。沸鑊旁觀慘若何。一點護兒心不死。自身餘肉已無多。

●魚乳【冊府元龜】

唐太宗貞觀十七年。帝觀魚於西宮。見魚躍。問其故。漁者曰。此魚乳也。於是止網。鶴子曰。生機洋溢。宛然周文王靈沼氣象。

詩箋。微生响濕沐皇仁。新乳魚兒躍錦鱗。藻影花光朝雨後。綠波灩灩十分春。

●魚爲子貸命【慈心寶鑑】他本作鱗

李沖元將破一魚。先夢皂衣嫗曰。妾腹中有五千子。妾生五千子亦生。妾死五千

子亦死。敢望哀憐。特貸一命。元遂放之。立意戒殺。後於水濱得珠。

詩箋。曾聞薛偉化魚身。魚腹如何也。幻人。但貸兒生甘就死。慈心極處。每通神。

●蠍蝮【酉陽雜俎】

蠍蝮形如蟬。其子如蝦。著草葉。得其子。則母飛來就之。【以上慈愛鑑】

鶴子曰。蝙蝠來尋母。母死而氣常存。蠍蝮來就子。子離而心常合。是中消息。微乎微乎。

詩箋。飛來認取葉斑斑。母子潛通一氣閒。螺贏空勞呼似我。相親畢竟不相關。

世間水陸與虛空 總屬皇天懷抱中

試令設身游釜甑 方知弱骨受驚忡

右錄唐白樂天戒殺詩

慈愛鑑終

三孫徐兆杏雨壇同校
湖南張海祉修五覆校

徐太史遺筆

恤孤鑑

民國二十四年春月上海霞飛路
護生報社營業部道德書局藏版

物猶如此卷之五

恤孤鑑目次

- 鬪穀於菟
- 虎憐孤苦
- 狐衛小鴛鴦
- 犬哺貓
- 李氏貓
- 貓代乳
- 鳥覆棄嬰
- 百鳥飼杜鵑
- 鵲替哺
- 來鶴寺鸛
- 慈鷄說
- 鷄翼雛

鵝護雛

仁魚

蛛留一絲

●以上恤孤鑑

●寒世子編

戒殺
快讀

●每册四分

溫光熹嘉言錄

●加外費寄 ●角二價定册每 ●

物猶如此卷之五

三巖徐 謙鶴子編 鄭 湘靈浦校刊

恤孤鑑【十五案】

彼亦人子。哀此藐孤。何怙何恃。無食無襦。物且保赤。旁觀歔歔。輯恤孤

鬪穀於菟【左傳】

鬪伯比生子文。邛夫人使棄諸夢中。虎乳之。邛子田見之。遂使收之。楚人謂乳穀。謂虎於菟。故名之曰鬪穀於菟。

鶴子曰。誕寘之隘巷。牛羊腓字之。誕寘之寒冰。鳥覆翼之。自昔聖君賢相。生多磨折。萬靈呵護。不特楚令尹子文也。

詩箋。呱呱何在。隱深蘆。夢澤風雲氣象殊。豈識他年賢令尹。無人乳哺遺於菟。

●虎憐孤苦【警心錄】

婺州根溪李姥。年六旬餘。數子相繼疫死。一孫七齡。相依爲命。時方春。姥偕孫往擷茶。一虎躍出林閒。徑攫其孫。姥挺身直前。攀虎大慟。述平生孤苦。且曰。不如食我。虎聞言。垂目弭耳。若慚悔狀。疾走而去。姥悲喜。挈孫以歸。

李斯義曰。語意悲切。猛如虎亦爲感動。中孚信及豚魚。實有此理。詩箋。虎前痛哭訴酸辛。乞宥孤孫食老身。羞惡心中兼惻忍。誰云物性不如人。

●狐衛小鴛鴦【類林】

鴛鴦養雛於土窟破冢之間。鴛鴦不在。狐則爲衛其子。

詩箋。鴛鴦他出代看雛。難得多情破冢狐。敢假虎威凌弱幼。記曾雲水在梁俱。

●犬哺貓【宋史】

宋張孟仁妻鄭氏。孟義妻徐氏。共室而居。妯娌無閒。寸縷不入私室。其乳貓爲人竊去。犬哺其兒。太宗聞之。旨表其門曰二難。

詩箋。未聞黃耳哺鳥員。失乳遺孤慘可憐。一視同仁忘物我。滿庭春盎太和天。

●李氏貓【警心錄】

李氏。大庾嶺民。畜二牝貓。各產四子。更出迭入。交相哺之。習以爲常。旬日後。一牝爲犬所噬。其一銜死者之子。置己窠。與其子合。死者之子。含怒作聲。意不相安。貓母徧舐環附。繾綣先後。不忍捨也。久之。乳力不能周。日以羸瘠。而奔走遮護如初。時終其擁哺。能自食乃已。

李斯義曰。推幼幼之心。以及人之幼。全始全終。卽聖人萬物一體之意。不謂物

且有然。

詩箋生死交情若此深。凌孤遑復念苔岑。試思一樣同胞視。何等慈悲懇到心。

●貓代乳【聖師錄】

唐時北平王家貓有生子同日者。其一死焉。二子飲乳。咿咿聲甚慘。初不知其母死也。其一方乳已子起而聽。走而救。銜一子置於其棲。又往如之。反而乳之。若已子然。

詩箋訝母酣眠喚不醒。咿咿索乳兩伶仃。此情慘痛憑誰告。難得關心掩淚聽。

●鳥覆棄嬰【東觀紀】

漢敬隱天后生時。會值擾攘。母棄之南山下。隆冬苦寒。再宿不死。外家偶過。聞啼聲。憐之。因往就視。有飛鳥舒翼覆兒。以爲神靈。攜歸養之。後爲后。

詩箋雪裏啼聲竄虎狼。阿嬌歸抱外家藏。翩翩孰庇椒房貴。莫是丹山老鳳凰。

●百鳥飼杜鵑【博物志】

杜鵑生子。寄之他巢。百鳥爲飼之。

鶴子曰。杜少陵詩云。生子百鳥巢。百鳥不敢曠。仍爲飼其子。禮若奉至尊。又云。寄巢生子不自啄。羣鳥至今與哺雛。正云此也。

詩箋。衆巢効力。飼雛飢。長養春風二月時。豈但蜀人思杜宇。銜恩百鳥不勝悲。

●鵲替哺【聖師錄】

大慈山之陽。有拱木。上有二鵲。各巢而生子。其母一爲鷺鳥所搏。二子失母。啾啾不已。其一方哺子。見而憐之。赴而救之。卽銜至一處。哺之不異其子。

詩箋。昨同樾蔭。慟離儔。銜子巢中撫。字周底事。風人詩未及。均平心。但美鳩鳩。

●來鶴寺鶴【警心錄】

邵伯埭。有來鶴寺。與佑聖觀爲隣。嘉靖癸巳。有鶴營巢其間。各二雛。佑聖之鶴。爲弋者所斃。其雛嗷嗷。日待哺於來鶴之鶴。鶴字均已子。候其羽成。飛鳴相逐。依依不舍。一時詫爲異事。

李斯義曰。漢第五倫。謂兄子與己子。有寐與不寐之分。言不能無私也。鄰又有間矣。均之一字。不意得之羽類。

詩箋。哺雛如母。憫牙牙。故侶同棲。歷歲華。身在東家。夜常起。婆心一半在西家。

●慈雞說【廣虞初新志】

陳子官京師。荆婦歸。鮮以夙興相警者。恐入公遲。畜雄雞一。令司晨也。匹以一雌。已而生卵。僕好事。作窠使伏之。甫得雛四。而雌雞已斃。窠內四雛悲鳴不已。若失

恃者然。雄喪偶。亦忘其爲誰氏子。旣而一雌匹之。雌至。環遶於雛之籠外。若瞰其幼而孤。若有憫恤狀。命僕啓籠納之。竟呼雛若己子。覆之藉之。飲之食之。其四雛亦欣欣依戀。竟似母去重來。不復悲鳴矣。陳子感而歎曰。雞亦有繼母乎。雞亦有繼母而慈其前母之子者乎。雞有五德。誰知又有一德可異也。雖然。慈愛爲性。物固有然。物豈能盡然哉。抑慈愛爲性。物且有然。人豈有不然哉。而何以猶有不盡然者哉。人惟不能盡然。則凡天下能得繼母之慈者。宜知幸矣。天下爲繼母而不慈前母之子者。宜知鑑矣。

悅旦自跋曰。余兄弟髻齡失恃。賴繼慈母張太孺人。撫如己出。得以成立。慈愛真出天性。然以吾母方之天下。百不得一。今見窗禽慈愛若此。深爲雛幸。益念余兄弟昔日之幸也。

詩箋。伯勞哀泣繞親車。此獨恩勤更有加。倘使護庭盡慈愛。孤兒何至衣蘆花。

●雞翼雛【王福徵述】

余家近年買一雞。雌而色白。已而買四雛。一斃於鼠。雛失母。日夜哀號。白雞憫而翼之。哺以食。晨則俟雛食已。率就朝暾。臥而舒翼。俾諸雛環偎其體。若恐伏地之冷也者。暮則率雛歸籠。有不知入者。引至籠口。攔入之。已亦並入雛籠。擁護之。每

日如是。後雛長。籠窄不能入。乃率雞羣中宿焉。越年餘。得一小雄雞。有他雞啄雛者。必怒而與之鬪。時復有啄他雛。則捨此而與彼鬪焉。又余二姑家。其伏雌護他雛。亦復相似。何物之恤孤比比也。

詩箋。食息呼雛。夙夜偕相依。如母戲苔階。是何風日太初世。繪出融融無我懷。

●鵝護雛【警心錄】

常州陳四家有黑白二雌鵝。兩窠相並。各哺數雛。未幾黑鵝死。白鵝每晨必至其窠。呼雛與己雛同啄園中。晚必領其雛至窠乃去。

李斯義曰。幼幼之道。物有之矣。奈人之殘刻性成者。骨肉仇讎。不惟不育其雛。而且欲破其窠也。獨何心哉。

詩箋。朝暮看雛各出窠。垂憐一日幾摩挲。故園更有悽情處。紅掌青苔舊跡多。

●仁魚【聖師錄】

海中有仁魚。嘗負一小兒登岸。偶以鬚觸傷兒。兒死。魚不勝悲痛。亦觸石死。

鶴子曰。無心死兒。痛悔莫及。未觸石而死之先。魚腸已寸斷矣。

詩箋。悲憤茫茫未有涯。仁魚保赤願空賒。死含餘恨猶噓氣。散作慈雲庇萬家。

●蛛留一絲【警心錄】

陳恂六偶坐簷下。見大蜘蛛結網簷畔。又一小蜘蛛連其旁。結小網於右。俄大網破。大蛛盡收其絲於腹中。將另結焉。獨左畔一絲牽連小網。若去則小網無所依。必毀。乃盤旋梁柱間。遲疑良久。竟不收而去。〔以上恤孤鑑〕

李斯義曰。天下惟大能字小。強可庇弱。若勢處強大。惟圖自便。不顧弱小之成。毀此不仁之甚者也。當此際而能存遲疑顧慮之意。則施恩無窮矣。

詩箋。巧蛛收網。雨黃昏。欲去遲疑。小網存。人世張羅爭利已。誰留繾綣一絲恩。

恤孤鑑終

三孫徐兆杏雨壇同校
湖南張海社修五覆校

汝欲延生聽我語 凡事惺惺須恕己
如欲延生須放生 此是循還真道理
他若死時你救他 你若死時天救你
延生生子別無方 戒殺放生而已矣

錄呂祖放生育子延年歌

徐太史遺筆

眷舊鑑

民國二十四年春月上海霞飛路
護生報社營業部道德書局藏版

物猶如此卷之六

眷舊鑑目次

義鹿冢
象悼亡
能仁寺猴
東峯雙猿
蜀烏猿
巧哥捷兒
詩送野賓
果然
犬戀主
貓戀主
白香山鶴
陳州鶴

三燕殉墓
蠟丸如故
鴻贖婦
景州鴈
隴山鸚鵡一
隴山鸚鵡二
滇南二鸚鵡
韓通判鸚鵡
郎無恙否
秦吉了
李氏鳩
徑山寺鷄冢
烏郎蒼女

● 寒世子編 ●

慈 生 編

覓偶而來
● 以上眷舊鑑

● 每册定價七分 ●

物猶如此卷之六

二三巖徐 謙鶴子編 鄭 湘靈浦校刊

卷舊鑑【二十六案】

衣不如新人不如故。古道云亡。悠悠陌路。感物情長。如泣如訴。輯眷舊

●義鹿冢【聖師錄】

銀臺侯廣成先生家。放一鹿於堯峯。且數年。侯死。鹿跳躑斷角。累日不食亦死。山僧憐而葬之。碣曰義鹿冢。

徐仲光贊曰。遂性離籜。依仁脫俎。生既蒙恩。沒亦從主。無天可呼。有邱其所。折角摧肝。孤峯坏土。

詩箋。嘯傲深山樂未曾。侯羸死後恨填膺。年年鹿冢憑誰薦。一掬寒泉付老僧。

●象悼亡【博物志】

日南貢四象。各有雌雄。其一雌死於九貢。至南海百有餘日。其雄泥土塗身。獨不飲酒食肉。長史問其所以。輒流涕若有哀狀。

詩箋。象中苟粲黯神傷。身辱泥塗肉味忘。宴爾新昏花燭爛。何人回念舊糟糠。

●能仁寺猴【警心錄】

淳熙間。知策長老。住持山陰能仁寺。畜猴甚馴。名孫大。以遺總管夏侯恪。策每訪恪。猴識轎乘僮僕。卽跳躑掣頓不已。恪憐之。仍歸策。策住山六年。辭去。不得一日。凌早爲遁計。猴覺其不類常時。卽泣下絕食。日未亭午而死。

李斯義曰。世人或棄舊求新。此猴只戀舊主人。而若此。豈有背主罔上之行哉。鶴子曰。此猴竟以死送別耶。何情之激烈也。然優於朝秦暮楚者。多多矣。斜陽拾橡之時。破窗落葉之夜。顧影寡耦。呼名誰應。長老何堪回首哉。

詩箋。舍舊謀新。恥未能。六霜丈室伴禪燈。悽惶亦欲追隨去。又恐關河累老僧。

●東峯雙猿【池北偶談】

鐵漢和尚。居金陵牛首東峯下。獨坐數十年。嘗畜二猿子。自隨。有所須。猿輒解意。與龍眠方學士坦菴拱乾善。特構一軒。方來卽居之。額曰坦軒。和尚化去。二猿悲鳴不食死。葬於塔側。學士題其遺像云。兩箇獼猴杖一根。獻花石上獨稱尊。怪公事事能超脫。留此賊私誤子孫。

鶴子曰。此與華林覺禪師侍者大空小空相類。然二空不聞隨師去也。

詩箋。無心鴻爪印泥中。畫裏雙猿侍遠公。一切有情都有性。可能拋性說真空。

●蜀烏猿【蕁鄉贅筆】

蜀中產烏猿。性最黠。能解人意。楚帥進於上林。其使者歸。猿長號而絕。宋宗卿徵輿作詩弔之曰。瀟湘寒月九疑風。盡日哀吟雲水中。借得上林無限樹。卻教歸魄入巴東。

詩箋。魂隨歸使到巴山也。勝思鄉。恕劣頑。無恙峽雲無恙月。不須怛悵未生還。

●巧哥捷兒【柳崖外編】

紹興程生幕於蜀。以一八哥一猴自隨。字八哥曰巧。字猴曰捷。客來則猴前導。客坐則八哥呼茶。及一切應用而細小者。輒令八哥銜之。客戲之曰。林逋常妻梅子鶴。子殆僕捷妾巧耶。捷與巧亦深相得。左之右之。馴習而向程生。一刻不見。輒互相覓覓。見而愈馴。一日生小院把酒對花。諭猴司閤。勿令俗客至。諭八哥。巧兒我圍帶在室。可取至。八哥應命飛入室。方出戶。有老雕自天陡下。攫得之。八哥度不能免。鬆口落帶。花堦上呼曰。程相公程相公。八哥被老雕攫去。帶子在花堦上。又呼曰。猴哥猴哥。聲愈哀而遠。生回首不見巧哥。堦上帶猶存。鮮血瀝瀝。毛羽紛飛。大叫一聲。酒盃擲十步許。摔坐橈幾碎。須臾猴已至。向天哀號。跳四五尺。猙獰拍手。繞帶血而轉者數十回。生謂之曰。捷我與若及巧哥性命之依也。今巧哥遭惡。

雕若能爲我雪此恥。爲巧復雛乎。猴點頭若解意者。署前有旗竿高數丈。近頂有斗。猴晨起持一雛雞盤竿而上。蹲斗中以一手擎雛雞露斗旁。一雕旋而下。將及斗。猴躍起攫得之。詳視裂殺之。而下置生前。生曰。若卽殺我巧哥者乎。猴擺手。意以爲非。是次日凌晨。又持雛雞往斗閒。如前狀。抵午。攫二雕裂殺之。又置於生前。生曰。二雕中有殺我巧哥者乎。猴又擺手。至三日。羣雕方盤旋大樹閒。猴入廚取碎肉可升許。散而布於地。猴藏樹閒。羣雕下貪食。猴審良久。疾下攫其一。急趨生前。活而按之。生曰。此果殺我巧哥之罪雕乎。猴點首。問何以知之。猴指其翅閒有血片。又有紅條挂於爪。視之。果卽八哥所繫者。程生設巧哥位。謂猴曰。捷兒行刑。猴遂瀝其血。滴巧哥位前。碎裂之。拜已不勝歔歔焉。【此案亦可入雪冤】

詩箋同羣鳥獸且忘形。驟聽哀號入杳冥。妙手空空雛已得。血風灑處泣幽靈。

●詩送野賓【警心錄】

王仁裕嘗從事漢中巴山。有採捕者獻猿兒焉。憐其小而黠。名曰野賓。呼之卽應。後壯盛。縻繫稍懈。逢人必嚙。縱鞭箠亦不畏。於是題詩紅綃繫於頸。詩曰。放爾丁甯復故林。舊來行處好。追尋月明巫峽。堪憐靜路隔巴山。莫厭深棲宿。免勞青嶂夢。躋攀應愜碧雲心。三秋果熟松梢健。任抱高枝徹曉吟。使人送入孤雲兩角山。

縱之不復來矣。後罷職入蜀。行次蟠冢廟前。漢江之壩。羣猿自峭巖連臂而下。飲於清流。有巨猿捨羣而前。於道畔古木閒。垂身下顧。紅綃宛在。從者指之曰。此野賓也。呼之聲聲相應。立馬移時。不覺惻然。縱轡之際。哀叫數聲而去。及陟山路。尙聞嗚咽聲。遂繼吟曰。蟠冢祠邊漢水濱。此猿連臂下嶙峋。漸來仔細窺行客。認得依稀是野賓。月宿縱勞羈絀夢。松餐非復稻粱身。數聲腸斷和雲叫。識是前年舊主人。

李斯義曰。離合聚散。悲喜交感。兩情惓惓。如有故人之意。讀此令人惜別。鶴子曰。黯然銷魂。惟別而已。二詩纏綿婉約。如讀江醴陵賦。野賓生色多矣。詩箋紅綃詩就。諷回環。送別孤雲兩角山。蟠冢重逢各含淚。餘聲猶繞亂峯間。

●果然〔本草綱目〕

交州及西南諸山有果然獸。其名自呼。狀大於猿。體不過三尺。而尾長過頭。鼻孔向天。雨則挂木上。以尾塞鼻。毛長柔滑。白質黑文。采色斑斕。而頰多髯。喜羣行。老者前。少者後。食相讓。居相愛。生相聚。死相赴。柳子厚所謂仁讓孝慈者是也。羅願云。人捕其一。則舉羣啼而相赴。雖殺之不去。謂之果然。以來之可必也。詩箋生死相隨不獨留。雍容歡侶碧山頭。孝慈仁讓人間少。誰錫嘉名柳柳州。

●犬戀主【警心錄】

復州簽判廳主管諸司錢物。常畜犬以警盜。有黃犬十餘年矣。吳興周礪居官。尤加意飼養。犬一如感恩者。常坐臥其傍。泊滿秩。其姪臯代之。以小兒女多慮。爲所驚。牽付蓮臺寺。明日復來。如是者再三。礪未去。嘗訪臯。犬認所乘轎。迎繞戀。戀伺其退。卽隨以行。臯會意。始置船中。後船至巴河。犬登岸未返。而舟人解纜東下。犬望見跳躑。嗥鳴奔隨。凡三四十里。礪顧見之。命小船呼載。旣得上。不勝喜。遂至湖州。

李斯義曰。十餘年豢養。去而復來。終不忍舍。恩義所結耳。余嘗讀程嬰李善諸傳。輒不禁慨然興歎。

詩箋。託君字下感恩多。古刹回頭悵若何。邂逅主人無限喜。看渠逐權下巴河。

●貓戀主【聖師錄】

蘇州齊門外陸墓一小民。負官租。出避家。獨一貓。催租者持去。賣之閭門鋪商。忽小民過其地。躍入懷。爲鋪中所奪。輒悲鳴。顧視不已。至夜銜一綾幌。內白金五兩。餘投之而去。

詩箋。此身已矣憶奴無。寂寞花陰念主孤。去住兩難心苦甚。留金料足抵官租。

●白香山鶴〔唐詩金粉〕

唐劉禹錫詩序云。友人白樂天。去年罷吳郡。挈雙鶴雛以歸。予相遇於揚子津。閱玩終日。翔舞調態。一符相書。信華亭尤物也。今年春。樂天爲祕書監。不以鶴隨。置之洛陽第一。旦予入門。問訊其家人。鶴軒然來。睨如舊相識。徘徊俯仰。似含情。顧慕填膺。而不能言者。因作鶴歎。以贈樂天。

詩箋。萍水曾逢揚子津。洛陽宅裏復相親。多情尙認劉賓客。同憶長安遠宦人。

●陳州鶴〔聖師錄〕

陳州倅盧某畜二鶴。甚馴。一創死。一哀鳴不食。盧勉飼之。乃就食。一旦鳴繞盧側。盧曰。爾欲去。不爾羈也。鶴振翻雲際。數四徊翔。乃去。盧老病無子。後三年歸臥黃蒲溪上。晚秋蕭索。曳杖林閒。忽一鶴盤空。鳴聲淒斷。盧仰祝曰。若非陳州故侶耶。果爾。卽當下。鶴徑投懷中。以喙牽衣。旋舞不釋。遂引之歸。後盧歿。鶴亦不食。家人瘞之墓左。

鶴子曰。哀鳴不食。是眷念同羣。鳴聲淒斷。是眷念故主。

詩箋。放鶴徘徊不忍飛。孤山無子老何依。黃蒲溪上重相遇。豈接盧敖鳥嶼歸。

●三燕殉墓〔警心錄〕

宋清溪王氏女。性柔惠。好陰德。堂有巢燕。一日其母爲貓噬。三雛餓將死。女以紅稻飼之。長大飛去。其冬女病死。明春燕復來。飛繞不已。母曰。吾女已死。葬園中矣。汝若覓之。可相隨也。燕隨母至墓。飛鳴哀惋。以喙啄墓。皆死。

李斯義曰。燕賴女以生。復從女死。所謂一死一生。乃見交情耶。從古忠孝節烈。不過此一念真誠。激而爲千古完人。讀此令人長嘆。亦令人起舞。詩箋。三雛失母。哺誰依。仗女恩勤。幸免飢。如雪梨。花春黯淡。年年魂繞故園飛。

●蠟丸如故【耳新】

金安撫使田琢。少從軍塞外。所居有雙燕來巢。土人欲捕之。田曲爲全護。忽一日飛止坐隅。呢喃不去。田悟曰。來朝秋社。汝當歸。殆話別乎。口占詩以贈之。詩云。幾年塞外歷崎危。誰道烏衣亦此飛。朝向蘆汀知有意。暮投茅舍重相依。卿憐我處頻迎語。我憶卿時不掩扉。明日西風悲鼓角。卿應先我我何歸。細書爲蠟丸繫。其足明年瓜代而歸。越八稔。任潞州觀察判官。偶坐廨舍之含翠堂。忽雙燕至。一飛簷戶閒。一上硯屏。諦視之。繫足蠟丸固在。乃知此燕蓋塞垣贈詩者也。同年龐才卿繪爲圖。作長歌記之。

李斯義曰。榆塞荒涼。人物相依。吟詩贈別。可稱佳話。距經八載。雙燕忽來。蠟丸

如故亦異矣哉。

鶴子曰。蠟丸詩抒情款款。含意深深。作伴還鄉。送雙飛而慶幸。塞居懷舊。悵子影之飄零。主客兩層纏綿都到。

詩箋等是楊花不住身。蠟丸珍重八回春。似曾相識來雙燕。還覓緘詩贈別人。

◎鴻贖婦【聊齋志異】

天津弋人得一鴻。其雄者隨至其家。哀鳴翱翔。抵暮始去。次日弋人早出。則鴻已至。飛號從之。既而集其足下。弋人將並捉之。見其伸頸俛仰。吐出黃金半錠。弋人悟其意。乃曰。是將以贖婦也。遂釋雌。兩鴻徘徊。若有悲喜。遂雙飛而去。弋人稱金得二兩六錢強。

鶴子曰。黃金何處銜來耶。而弋者悟其贖婦。亦解人哉。不知抵暮獨去後。竟夕中何等輾轉也。

詩箋。秋胡重見喜開顏。幾贖文姬入漢關。人世黃金如此易。不勞再築望夫山。

◎景州鴈【秋坪新語】

景州李鏡亭嘗得一鴈。蓄之庭。雜鵝鷺中。甚馴擾。一日鴈羣過空中。所蓄鴈昂首長鳴。倏一鴈飛落。蓋其牝也。交頸宛轉。鳴聲啞相應。答如訴離愁。如話久別。而

乍相親暱也。久之乃同飛去。明年鴈來。前蓄者自投下。啞啞向鵝鷺羣。如道故者。至前所栖食處。徘徊顧視。旋復升堂入戶。周歷幾遍。見主人出。伸頸鼓翼。嘹嚙長鳴。依戀遲迴之態。如不勝逾刻許。乃翩然而起。追逐其羣去。一時觀者莫不歎異。鶴子曰。讀至交頸宛轉哀鳴話別。令人增伉儷之重。讀至啞啞道故。徘徊不捨。令人增友誼之重。及見主人悲喜交集。依戀遲迴。令人增主恩之重。

●隴山鸚鵡一【警心錄】

明皇宮中養鸚鵡數百。一日問之曰。思鄉否。對曰。思鄉。遂遣中貴送還山中。後數年。有使臣過隴山。鸚鵡問上皇安否。使臣曰。上皇賓天矣。鸚鵡皆悲鳴不已。使臣賦詩曰。隴口山深草木荒。行人到此斷肝腸。耳邊不忍聽鸚鵡。猶在枝頭說上皇。李斯義曰。天寶之亂。賊臣如祿山。不足論矣。當日張均張瓘輩。在賊中指斥官家。豈豢養不如鸚鵡乎。或曰。枝頭上皇之詩。使臣飾詞耳。何也。郭浩諂佞之尤者也。其過隴也。按邊也。歸宜曰。韋臯殺朱泚之使。氣尙烈烈也。使上惕然思報忠與防奸。李及款中貴之薄。風尙矯矯也。使上恍然知揚清與激濁。且隴亭半多流離。秦城不堪食邑。如繪鄭監之圖。使上憂恤民生。思其艱以圖其易。乃計

不出此。而徒託諸林間恍惚之聲。造爲婉媚淒涼之調。嬖倖之容悅。曾何益於國家哉。

鶴子曰。李評責唐使良是。但古來傳記。物類篤於忠愛者不一。隴山悲鳴。又奚疑哉。

詩箋。聲聲頻問上皇安。曾記深宮帶笑看。隴水不流助嗚咽。鼎湖夢斷路漫漫。

●隴山鸚鵡二【聖師錄】

宋高宗時。隴西獻能言鸚鵡。命養於宮中。久之。問曰。爾思鄉乎。曰。豈不爾思。思之何益。乃遣使送還隴山。數年後。使者過其地。鸚鵡問曰。上皇安乎。曰。升遐矣。鸚鵡南向悲鳴不已。

詩箋。隴山南望不勝哀。目送迢迢使節回。五國城頭霜月苦。可曾鴈信問安來。

●滇南二鸚鵡【聖師錄】

李邁菴自記。自滇遊回。有僕染瘴而死。僕攜有二鸚鵡。流淚三日不休。亦死。

詩箋。洱海煙黃瘴不收。主人白骨掩荒邱。如何一樣傷心甚。死到黃泉淚尙流。

●韓通判鸚鵡【春渚紀聞】

韓奉議官隴州通判。家人獲鸚鵡。未幾忽語之曰。比苦思鄉。家人憐而放之。後有

自隴差至京師者。憩道旁樹下。條聞鸚鵡呼曰。君認我否。我是韓通判家鸚哥。到京煩爲我傳語。多謝故人家山甚樂也。

詩箋。雲水翛然自在身。誤謀紅稻絆紅塵。關山那有家山樂。寄語天涯薄宦人。

●郎無恙否【聖師錄】

關中商人得能言鸚鵡於隴山。愛而厚食之。因事下獄。歸時歎恨不已。鸚鵡曰。郎在囹圄未逾旬。懊惱如是我。閉籠累年。奈何。商感而放之。後商同輩有過隴山者。鸚鵡必於林閒問曰。郎無恙否。幸寄聲。幸寄聲。

鶴子曰。自起開籠放白鸚。此商可嗣響雍陶矣。

詩箋。片言打動主人心。可悟人心感易深。借問郎今無恙否。多情誰似隴山禽。

●秦吉了【情史】

天后時。左衛兵曹劉景陽。使嶺南。得秦吉了二隻。能解人語。至都進之。留其雌者。雄煩怨不食。則天問曰。何無聊也。鳥曰。吾配爲使者所得。切思之。因呼景陽曰。卿何故匿一鳥耶。景陽叩頭謝罪。乃進之。則天不罪也。

詩箋。一路雙棲乍別離。難銜紅豆寄相思。影孤怯對瑤階月。何處聲聲叫畫眉。

●李氏鳩【陳忠裕集】

畜鳩者。以五月五日翦其舌。取汞硫火鍊之。成靈砂。雜米菽。日三飼。變易其心。則能爲人言。過於鸚鵡。李氏有一鳩。甚慧。養之數年矣。日則飛翔於欄楹簾幙間。不遠去。夕宿於籠。以避狸鼠。見童婢有私持物及摘花者。必告其主人。晉人賈於吳者。見之。願以十金易焉。鳩覺其意。告主人曰。我居此久。不忍去。公必欲市我。他所。我且不食。主人給之曰。我友有欲觀汝者。卽攜汝歸耳。至買家。則舍之去。鳩竟不食。哀鳴告歸。賈人憐其志。且恐鳩死而金無取償也。遂捐金十之二。而以鳩還李氏。鳩乃食。

陳臥子曰。鳩拙鳥也。不輕去就。其儀一兮。是以詩人比之君子。而屈氏猶惡其佻巧何也。

詩箋。故園桑徑。月淒清。情况依依。夢不成。萬想千思。歸去好。新人恩重。報來生。

●徑山寺雞冢【宋高僧傳】

杭州徑山釋法欽。養一雞。不食生類。隨之若影。不遊他所。及僧入長安。哀鳴三日而絕。今雞冢在山也。

詩箋。三生帶得善根來。久傍禪扉舊綠苔。一片行雲留不住。寒窗風雨助啼哀。

●烏郎蒼女【聖師錄】

湯初煥。佐郡江右。在任生女。及週。郡人饋以鵝。頸爲盒擔壓折。折成之字。夫人憐而畜之。後罷郡歸。親黨又饋以鵝。乃缺一掌者。亦憐而畜之。一雌一雄。遂成匹偶。雄曰烏郎。雌曰蒼女。呼其名。卽應聲。至行。則讓缺掌者先食。則讓折頸者先畜。至三十餘年。迨夫人歿。二鵝哀號不食死。

鶴子曰。一缺掌。一折頸。偕老三十餘年。漆園所云。以不材終其天年也。

詩箋。秩然有禮。宛如賓相。敬相憐。三十春。莫笑老鵝同缺陷。昂藏竟似兩完人。

●覓偶而來【警心錄】

山陰陳爾誠。於門前簷獲巨鼈。置廚內水缸。其祖華宇。自外暮歸。窺見缸側一鼈。意其爲覓偶而來也。並取置缸內。則聚首眷戀。不相捨。誠感歎。遂攜放瀆中。自此舉家戒食鼈。【以上眷舊鑑】

詩箋。有情眷屬。盡堪哀。誰喻蹒跚覓偶來。假使夜闌人未見。不知含淚若何回。

眷舊鑑終

徐太史遺筆

踐信鑑

民國二十四年春月上海霞飛路
護生報社營業部道德書局藏版


物猶如此卷之七

踐信鑑目次

- 申州虎
- 虎赴西關約
- 黃耳冢
- 圍城犬負米
- 博羅犬
- 鶴寄詩
- 燕寄詩
- 鴈繫書
- 飛奴
- 真定鵠
- 五時鷄
- 潮鷄

成都溫光烹著

飛魚失書
 ●以上踐信鑑



觀音法要

●每册定價一角●寄費外加●

◀ 寒世子編輯 ▶



觀音起信編

●每册一角●五册八折●十册七折●

物猶如此卷之七

三巖徐

謙鶴子編

鄭

湘靈浦校刊

踐信鑑【十三案】

燕鴻應候。豚魚孚誠。無輓無軌。車何以行。白水信誓。陰雨寒盟。輯踐信

●申州虎【警心錄】

貞元閒。王徵爲申州牧。時多虎暴。徵約得一虎者。酬十縑。有老卒丁崑。善爲陷阱。不數日。得一虎。聚觀者千百人。時崑方被酒。因衣襟挂樹根。墜阱中。衆駭甚。乃以轆轤下巨索。令崑自縛引之上。崑得索引去地二三尺。虎則躡其索而留焉。如此數四。崑謂虎曰。爾輩縱暴。理宜翦除。衆所以未卽屠者。以我故也。汝能從我。當白太守。捨爾之命。爾其率羣輩遠離此土。我當質之。天日不渝。此約。虎諦聽。若有知解。崑再引繩。虎不復留。旣得出。遂白太守曰。今殺一虎。不足除羣虎之暴。乞捨之。令其率羣虎去耳。徵許之。崑乃積土坑中。虎躍出。嘯風而逝。自是羣虎屏跡。

李斯義曰。爲阱得虎而自墜。此時虎何難噬崑。衆何難屠虎。然衆所以不遽屠虎者。以崑故而虎所以不遽噬崑者。以求出故。從來兩不相害。則可以兩全。崑

踐約而虎屏跡。豈不兩得乎哉。

詩箋。食言罕見。信由中心。諾潛消坎窞凶。擒虎不難。難縱虎。腥風萬壑。轉仁風。

●虎赴西關約【排悶錄】

山西孝義縣郭外環山多虎。一樵者朝行叢箐中。失足墮虎穴。兩小虎臥穴內。穴如覆釜。三面石齒廉利。前壁稍平。高丈許。蘚落如溜。爲虎逕。樵踴而蹶者數。徬徨遶壁。泣待死。日落風生。虎嘯踰壁。入口銜生麋。分飼兩小虎。見樵蹲伏。張爪奮搏。俄巡視。若有思者。反以殘肉食樵。入抱小虎臥。樵私度虎飽。朝必及味。爽虎躍而出。卓午復銜一麋來飼其子。仍投餒與樵。樵餒甚。取餒渴自飲其溺。如是彌月。浸與虎狎。旣而小虎漸壯。虎負之出。樵急仰天大號。大王救我。須臾虎復入。卷雙足。俛首就樵。樵騎虎騰壁上。虎置樵。攜子行陰崖灌莽。禽鳥聲絕。風獵獵從黑林生。樵益急呼大王。虎卻顧。樵跪告曰。蒙大王活我。今相失。懼不免他患。幸終活我。導我中衢。我死不忘報也。虎頷之。遂前至中衢。反立視樵。樵復告曰。小人西關窮民也。今去將不復見。歸當畜一豚。候大王西關三里外郵亭之下。某日時過饗。無忘吾言。虎點頭。樵泣。虎亦泣。迨歸。家人驚訊。樵語故。共喜。至期具豚。方事宰割。虎先期至。不見樵。竟入西關。居民見之。呼獵者閉關柵。矛挺銃弩。畢集約生擒。以獻邑。

宰樵奔救。告衆曰：虎於我有大恩。願公等毋傷衆。竟擒詣縣。樵擊鼓大呼。官怒。詰樵具告前事。不信。樵曰：請驗之。如誑。願受答。官親至虎所。樵抱虎痛哭曰：救我者大王耶。虎點頭。大王以赴約入關。耶復點頭。我爲大王請命。若不得。願以死從。大王言未訖。虎泪墮地。如雨。觀者數千人。莫不歎息。官大駭。趨釋之。驅至亭下。投以豚。矯尾大嚼。願樵而去。後名亭曰義虎亭。南昌王猷定記。

王子曰：予聞唐時有邑人鄭興者。以孝義聞。遂以名其縣。今亭復以虎名。然則山川之氣。固獨鍾於此邑歟。世往往以殺人之事。歸獄猛獸。聞義虎之說。其亦知所愧哉。

詩箋：虎解回思。憫負薪。荷恩急難。兩全身。臨歧對泣。悲風起。千載荒亭。感路人。

●黃耳家【述異記】

晉陸機少好獵。在吳時。有客獻快犬。曰黃耳。機入洛。常將自隨。犬黠慧。能解人語。又常借人三百里。奴犬識途導之行。機羈官京師。久無家問。戲語犬曰：我家久斷音耗。汝能賚書取消息否。犬喜。搖尾作聲。應之。機試爲書。盛以竹筒。繫犬頸。犬出駟路。走向吳。每經大水。輒依渡者。弭毛掉尾向之。因得載渡。到機家。口銜筒。作聲示之。機家啓筒。取書看畢。犬又向人作聲。如有所求。其家作答書內筒。仍繫犬頸。

犬復馳還洛。計人行五旬。犬往還纔半。後犬死。葬機家村南二百步。聚土爲墳。村人呼爲黃耳冢。

詩箋。綺年入洛。飲香名。黃耳還鄉。路幾程。一紙家書萬金抵。洪喬投渚太無情。

●圍城犬負米【聖師錄】

楊光遠叛青州。有孫中舍。居圍城中。族在西州別墅。城閉久。食盡。舉家愁歎。犬徬徨其側。似有憂思。中舍因囑曰。爾能爲我至莊取米耶。犬搖尾若應狀。至夜置一布囊。并簡繫犬背上。犬由水竇出。至莊鳴吠。居者開門。識其犬。取簡視之。令負米還。如此數月。以至城開。孫氏闔門。賴以無饑。愈愛畜此犬。後數年。斃。葬於別墅。至其孫彭年。語龍圖趙師民。刻石表其墓。曰靈犬誌。

鶴子曰。四郊多壘。勢將拔幟孤城。七日無糧。困更斷炊。累月擬汎舟。兮何所。同仰屋以興嗟。當是時也。倉葛怒而呼。臣朔飢欲死矣。猗孫門之靈犬。忿戎莽之逼人。傍主若憂。含情莫訴。寸丹敢竭。雖歷艱阻而甘心。尺素請裁。願負橐囊以報命。怡然出竇。俄而還家。晝伏夜行。獨越阡而度陌。驚聲顧影。想履險而乘危。一時菜色回春。鬢桑免餓。伊誰之力歟。夫見義必爲勇也。相時而動智也。臨蹇不懼忠也。踐約不渝信也。厥後馬鬣安骸。龍圖表碣。宜哉吁。靈縱渺渺。尙護片

石之苔花。寒食年年。合酌半盃之麥飯。

詩箋。圍城坐困絕餼糧。乞米帖誰郵舊莊。盡室回生靈犬力。虧他一路負歸囊。

●博羅犬【偃曝餘談】

博羅何字母死。廬墓家無僕從。一黃犬間日輒候墓所。有所需。卽書片紙繫頸。家人見之。具備繫使負還。無或爽者。

詩箋。往來供乏歷年華。廬墓郵書望眼賒。蕭穎士奴輸捷足。陸家黃耳復何家。

●鶴寄詩【內觀日疏】

才女晁采。養一白鶴。字素素。一日小齋坐雨。念其夫于役久。乏音問。謂鶴曰。昔西王母青鸞。郭紹蘭紫燕。皆能寄書達遠。汝獨不能乎。鶴延頸向采。若受命狀。采卽援筆直書二絕句繫其足。竟致其夫。尋卽俶裝歸矣。

鶴子曰。曰歸曰歸。歲云暮。其雨其雨。怨朝陽。未免有情。誰能遣此。此情之得其正也。鬱金堂上。望夫山頭。烏得胎仙在。在傳書哉。

詩箋。征夫聿至喜無端。鶴使多勞瘁羽翰。剪燭西窗同話雨。詩箋舊淚未全乾。

●燕寄詩【情史】

長安豪民郭行先女紹蘭。適巨商任宗。任久賈於湘。蘭睹雙燕戲梁間。長吁語曰。

我聞燕子自海東來。往還必經湘中。我壻離家數載矣。音耗杳然。存亡未卜。欲憑爾附書投於我壻。言訖。雨淚。燕似有所諾。蘭復問曰。爾若相允。當泊我懷。燕徑飛膝上。蘭吟詩云。我壻去重湖。臨窗泣血書。殷勤憑燕翼。寄與薄情夫。遂小書緘繫燕足。燕飛鳴而去。任時在荊州。忽雙燕回翔頭上。訝視之。遽泊其肩。有小函繫足解而覽之。乃妻所寄詩也。感而泣下。燕復飛鳴而去。次年任歸。以詩示蘭。宰相張說敘其事而傳焉。

鶴子曰。商人重利輕別離。前月浮梁買茶去。彼計以月。此計以年。任之歸。燕之力也。唐人詩云。嫁得瞿塘賈。朝朝誤妾期。早知潮有信。嫁與弄潮兒。是商得詩泣下。挂席言旋。視瞿塘賈之爽信何如耶。

詩箋。裁詩好寄任公子。臨發開封帶淚哦。湘月莫遲送雙影。倚樓南望夜如何。

●鴈繫書【元史】

汴中人射鴈金明池。得繫帛書。詩云。霜落秋高恣所如。歸期回首是春初。上林天。子援弓矢窮海。孤臣有帛書。至元五年九月一日放鴈。獲者勿殺。國信大使郝經書於真州真勇軍。

詩箋。鴈足傳書又子卿。海天雪窖共淒清。孤臣心事更誰寄。望斷寒雲此際情。

③ 飛奴〔開元遺事〕

唐曲江張九齡少養羣鴿與親知書繫鴿足依所教處飛往投之無一差舛因目爲飛奴。

詩箋。鴈帛魚書杳莫尋。停雲空自撫幽琴。相思綿渺關山隔。仗爾飛奴達素心。

● 真定鴿〔輟耕錄〕

顏清甫幼子獲一鵓鴿。翎閒有書一緘。籤題云。家書付男郭禹開拆。乃曲阜縣尹郭仲賢也。蓋其父自真定寄至者。時仲賢改授遠平縣尹。去鴿未知也。盤桓尋覓。遂遇害。清甫見之。責其子。使取木匣函鴿。直抵仲賢署。獻書與鴿。具白以故。仲賢憮然曰。畜此鴿已十七年矣。凡有家書。雖隔數千里。能傳至。命左右瘞之。

詩箋。拜命燕山寄好音。移官何處幾回尋。一緘空繫身先死。地下猶懸未了心。

● 五時雞〔洞冥記〕

影娥池北鳴琴苑。有伺夜雞。隨鼓節而鳴。從夜至曉。一更爲一聲。五更爲五聲。亦曰五更雞。

詩箋。風雨瀟瀟夜色清。五更雞唱聽分明。影娥池畔瑤琴靜。恰應譙樓畫鼓聲。

● 潮雞〔袖中記〕

移風縣有雄雞。聲如鼓角。每潮至則鳴。時號爲潮雞。

詩箋。朝潮夕汐。信誰知。喔喔雞聲壯且悲。一聽海風先鼓翼。門前正到雪濤時。

◎飛魚失書【居錄續卷】

謝長裾往觀魚洞天。每念瓊卿。輒命一魚寄訊。魚飛入青天。輕於片紙。往來甚遠。一日飛至桂海。與龍隱岩龍鬪。失其書。恐長裾責之。立化於西山之後。爲石馬。卽今立魚峯是也。【以上踐信鑑】

鶴子曰。歛忽靈幻。魚也龍乎。

詩箋。日望空中接報書。故人問訊近何如。殷勤尺素千鈞託。石馬無聲恨有餘。

血肉淋漓味足珍 一般痛苦怨難伸

設心處地捫心想 誰肯將刀割自身

錄宋陸放翁詩

踐信鑑終

三孫徐兆杏雨壇同校
湖南張海祉修五覆校

徐太史遺筆

守廉鑑

民國二十四年春月上海霞飛路
護生報社營業部道德書局藏版

物猶如此卷之八

守廉鑑目次

周藩馴虎

豹廉

浯溪白驢

芮氏犬

陸氏犬

丹穴鳳

禽避食卵

審山鶴

池上鳴鶴

介鳥

黃山白鷗

越王鳥

信天緣

烏蛇食花氣

蟬五德

●以上守廉鑑

寒子屠世
觀場參記

●每册定價三分●

寒世子編輯

關帝靈感錄

●每册一角●五册八折●十册七折●

物猶如此卷之八

三巖徐 謙鶴子編 鄭 湘靈浦校刊

守廉鑑【十五案】

桑扈竊脂。馬不食脂。雞廉狼貪。物性難齊。我思古人。泌水樂饑。輯守廉

周藩馴虎【池北偶談】

先祖方伯公爲河南按察使。時周王府有馴虎。日惟啖豆腐數斤。猛虎如此。何異
騶虞。

鶴子曰。似此寅客。愧殺封使君矣。

詩箋。不知肉味有餘歡。守素休嗤骨相寒。豪氣漸平心漸淡。向來虎穴捋鬚難。

●豹廉【埤雅】

古詩云。飢豹食有餘。言豹廉也。

按字說。豹性勺物而取。程度而食。故字口口又名程。

詩箋。深霧冥冥善晦藏。南山不自耀文章。老饕那識盈虛理。自古留餘味更長。

●浯溪白驢【王念菴述】

莪外大父東川紀公。居浯溪。嘗養一白驢。力而馴。雖飢甚。從不食田中物。公愛之。未幾。人竊去。一日偶過其地。驢遠望哀鳴。視之。卽所失驢也。以四金贖回。後驢衰病。有勸公殺以煎膠者。公曰。此驢効力十餘年。今因老憊而殺之。不忍也。適驢在側。淚潸然下。及驢死。埋以破席焉。

詩箋。浯溪水草樂忘年。風雪橋頭忍餓旋。天物豈容輕暴殄。怒渠黃犢慣蹊田。

●芮氏犬【聖師錄】

常州芮氏家貧。日飼犬以糠粃。其鄰爲富室姚氏。犬多餘食。所限僅一小竹籬。姚犬每向籬竄。低聲搖尾。若招呼狀。芮犬蟠曲臥地。惟昂首相應。絕不過食其餘粒。如是以爲常。

鶴子曰。五代史云。南唐江州陳氏族七百口。畜犬百頭。共一牢而食。一犬不至。諸犬不食。觀此。則犬不特知廉介也。且知禮讓。

詩箋。食貧守竇歷星霜。多謝鄰情惠豈忘。糠粃膏粱都有命。觸籬何敢效羝羊。

●陸氏犬【警心錄】

陸思俊秀州呂氏老幹也。家畜犬。劇馴。凡七八年。陸夫妻繼亡。遂空其室而扃之。犬猶日臥戶下。僂僂然往來他所。已復歸。常作聲鳴鳴。若有所尋索而悽咽者。鄰

人不忍。或以糟糠呼飼之。不食。久而肉消骨立。長號數聲而死。

鶴子曰。犬何介而義哉。霜月寒宵。癯影獨弔。恍若鬼火往來空中感泣也。

詩箋。皮毛脫落。臥柴關。老屋荒涼。蔓草閒。不食。嗟來甘餓死。清風想見首陽山。

●丹穴鳳【孔演圖】

鳳生丹穴。非梧桐不棲。非竹實不食。非醴泉不飲。身備五色。鳴中五音。有道則見。飛則羣鳥從之。

詩箋。歸昌應瑞德。徽昭不易來。儀下絳霄。顧視清高。桐百尺。勞勞塵世等鶴鷄。

●禽避食卵【括地圖】

孟虧人首鳥身。其先爲虞氏馴百禽。夏后之末。民始食卵。孟虧去之。鳳凰隨焉。止於丹山。去九疑萬八千里。此山多竹。長千仞。鳳凰食竹實。孟虧食木實。

詩箋。丹山木實足忘飢。世味濃時古味希。莫謂玉團非肉食。未開混沌滿生機。

●審山鶴【居易錄】

予嘗記揚署貞鸞事。適觀朱近修義鶴記。異焉。審山周氏者。養鶴二。順治乙酉。周闔門死。兵掠鶴去。鸞溪上陳氏。其雄哀鳴不食死。雌不偶他雄。一日翔於野。見審山浮圖。百里外飛赴之。徘徊浮圖下三日。周之遺僕某。聞而往觀。鶴望僕踊躍投。

懷不去。遂攜以歸。始供魚不給。繼粟又不給。鶴自投竈下。伺其飯。啄餘粒。或竟日飢。羽毛凋敝。終不他去謀食。觀者皆太息。或泣下云。

鶴子曰。是雄是雌。節義兼而有之。觀其隨僕遠歸。忍飢竟日。又何其毅然自守耶。

詩箋。未同殉主。錯孤飛。甘餓歸來舉目非。含淚相看惟老僕。青苔白骨黯斜暉。

●池上鳴鶴【唐詩金粉】

夫已氏曰。予池上有鶴。介然不羣。烏鳶雞鵝。次第爭噪。若相嘲者。鶴亦時復一鳴。予非公冶。不通其意。因戲代贈答。以意斟酌之。成八絕句。聊資一噱云爾。雞贈鶴曰。一聲警露靈誰似。五德司晨世不多。未必立羣盡嵇紹。重君輕我意如何。鶴答雞曰。爾因爭食泥中鬪。我獨鳴臯松上栖。塵世何知有仙骨。都輕野鶴重家雞。烏贈鶴曰。與君黑白太分明。縱不相親莫見輕。我每夜啼君怨別。七絃琴裏忝同聲。鶴答烏曰。矯矯凌雲出塵表。紛紛攫肉下田中。我音中羽君音角。琴譜雖同調不同。鳶贈鶴曰。詩人稱鶴亦稱鳶。君也聞天我戾天。同病相憐復相笑。飢來一樣癡腥膻。鶴答鳶曰。天空海闊莫相非。清濁仙凡各有歸。碧落彩雲鸞鶴侶。幾時曾見汝曹飛。鵝贈鶴曰。君曾緱嶺隨王子。我幸山陰伴右軍。標格一般人世重。但輸捷

足步青雲。鶴答鵝曰。右軍去後欲何依。月白霜高自在飛。見否犧牲及鸞鶴。大都我瘦讓君肥。

詩箋。鳥言也。足解人頤。三百篇中不廢詩。老鶴一聲倩誰語。素心惟有白雲知。

●介鳥【禽經】

雉。介鳥也。耿介而一志者也。

爾雅翼云。澤雉十步一啄。百步一飲。因地之墳衍以爲疆界。分而護之。不相侵越。

詩箋。稜稜介節。仰昂藏。飲啄儵然。步武詳。盡日山光自怡悅。時哉何處不山梁。

●黃山白鷗【唐詩金粉】

李太白詩序云。聞黃山胡公有雙白鷗。蓋是家雞所伏。自小馴狎。了無驚猜。以其名呼之。皆就掌取食。然此鳥耿介。尤難畜之。余平生酷好。竟莫能致。而胡公輒贈於我。惟求一詩。聞之欣然。適會宿意。因援筆三叫。文不加點。以贈之。曰。請以雙白璧。買君雙白鷗。白鷗白如錦。白雪恥容顏。照影玉潭裏。刷毛琪樹閒。夜棲寒月靜。朝步落花閒。我願得此鳥。玩之坐碧山。胡公能輒贈。籠寄野人還。

鶴子曰。右軍以書籠山陰之鵝。以去。太白以詩換黃山之鷗。而歸。同一韻事。

詩箋。拜貺雙鷗喜且謳。飄然塵外兩風流。他時好謝碧山月。還汝黃山雲水秋。

●越王鳥【本草綱目】

羅山疏云。越王鳥。狀類烏鳶。足長口勾。末如冠。不踐地。不飲江湖。不啜百草。不食魚。惟啖木葉。

詩箋。誰將烏喙越王稱。木葉充飢冷笑鷹。罕見禽中陳仲子。不啜半李勝於陵。

●信天緣【本草綱目】

晁以道云。鵝之屬。有曰漫畫者。以喙畫水求魚。無一息之停。有曰信天緣者。終日凝立。不易其處。俟魚過。乃取之。所謂信天緣者。卽俗名青翰者也。又名青莊。此可喻人之貪廉。

詩箋。終朝凝立冷雲中。付予隨天不怨窮。畫水求魚爭一飽。歡娛無幾轉眸空。

●烏蛇食花氣【乾甯記】

烏蛇。不食生命。亦不害人。多在蘆叢中。吸南風及其花氣。

詩箋。飲氣餐風體欲仙。蘆花叢裏自年年。不戕生命全生理。應共騰蛇上九天。

●蟬五德【陸雲蟬賦】

昔人稱雞有五德。而作者賦焉。至於寒蟬。頭上有綏。則其文也。含氣飲露。則其清。

也。黍稷不享。則其廉也。處不巢居。則其儉也。應候守節。則其信也。君子則其操。可以事君。可以立身。豈非至德之蟲哉。【以上守廉鑑】

鶴子曰。曹植蟬賦云。實淡泊而寡欲兮。獨怡樂而長吟。聲嗷嗷而彌厲兮。似貞士而介心。駱賓王蟬賦云。吟喬樹之微風。韻資天縱。飲高秋之墜露。清畏人知。合而觀之。寒蟬高品。和盤托出矣。

詩箋咏蟬深訝玉溪生。難飽徒勞恨費聲。豈識居高心淡定。任他樹樹碧無情。

同生今世亦前緣 同盡滄桑一夢間

往事不堪回首論 放生池畔憶前愆

錄明趙松雪詩

守廉鑑終

三孫徐兆杏雨壇同校
湖南張海社修五覆校

■讀蓮池大師聞聲不忍食肉執敬書八偈以遺同好

聲緣肉痛乞殘身	到耳心傷識妙神	寄語世人元一體	忍貪牙血喪天真
物我從來本一真	幻形分處不分神	如何共嚼娘生肉	大地哀號慘殺人
聲與無聲莫浪聽	無聲隱痛轉惺惺	請君下筋睜睛看	血肉團中有性靈
聲聲冤訴最慙慙	食肉心堅若罔聞	肯向忍中完不忍	凡夫應卽是迦文
飯蔬覆醢聖人心	耳順渾如觀世音	一念無欺成法忍	冤消永劫不相侵
哀聲入鼎忽生香	耳鼻雙聞孰主張	涎濕淚流君自忍	魔兵戰退現心王
赤肉和刀噴血光	悲號未斷裂肝腸	忍心人逐蠅頭利	珍重饒夫仔細嘗
稽首空行水陸神	賽酬烹宰痛前因	何緣枉祐癡男女	好自回光出妄塵

錄明宋守一詩

國民二十四年秋月初版

歡迎翻印

◎物猶如此

全部二冊

◎每部祇收特別價洋一角五分

◎上百部九折 千部八折

◎寄費外加 會員免郵

◎每部附贈獎憑一紙

發行所 上海道徳書局

地址 上海霞飛路嵩山路口

電話 八二七七四

上海圖書館藏書



A541 212 0013 9339B

